

攻

媿

集

一





攻 媿 集
(一)

J
17.8
102003

樓 鑰 撰

攻媿集目錄

卷一

古體詩五十四首

卷二

古體詩五十一首

卷三

古體詩四十二首

卷四

古體詩三十三首

卷五

古體詩三十首

卷六

古體詩十一首

楚辭一首

琴操二首

卷七

今體詩八十二首

卷八

今體詩一百二十四首

卷九

今體詩一百二十一首

卷十

今體詩一百一十三首

卷十一

今體詩九十四首

卷十二

今體詩九十八首

卷十三

今體詩一百六十七首

卷十四

今體詩一百五十首

卷十五

表牋十九首

卷十六

表牋二十八首

卷十七

表牋三十首

卷十八

表牋十九首

卷十九

表牋十八首

卷二十

奏議十二首

卷二十一

奏議八首

卷二十二

奏議七首

卷二十三

奏議七首

卷二十四

奏議六首

卷二十五

奏議七首

卷二十六

奏議十一首

卷二十七

奏議五首

卷二十八

奏議九首

卷二十九

奏議十四首

卷三十

奏議十首

卷三十一

狀劄十三首

卷三十二

狀劄三十首

卷三十三

狀劄三十三首

卷三十四

外制八十七首

卷三十五

外制七十一首

卷三十六

外制五十四首

卷三十七

外制五十七首

卷三十八

外制五十三首

卷三十九

外制七十六首

卷四十

外制六十九首

卷四十一

外制六十四首

卷四十二

內制四十一首

卷四十三

內制三十九首

卷四十四

內制四十四首

卷四十五

內制十四首

卷四十六

內制二十八首

卷四十七

內制一百一十三首

卷四十八

內制八十三首

卷四十九

證議六首

卷五十

進故事六首

卷五十一

序八首

卷五十二

序十七首

卷五十三

序十五首

卷五十四

記九首

卷五十五

記十首

卷五十六

記七首

卷五十七

記八首

卷五十八

記七首

卷五十九

記五首

卷六十

記四首

卷六十一

啓二十九首

卷六十二

啓二十首

卷六十三

啓十五首

卷六十四

啓十八首

卷六十五

啓十六首

卷六十六

書七首

碑二首

卷六十七

書四首

卷六十八

書七首

卷六十九

題跋二十首

卷七十

題跋四十八首

卷七十一

題跋五十一首

卷七十二

題跋三十首

卷七十三

題跋二十三首

卷七十四

禮書十五首

題跋三十二首

卷七十五

題跋三十三首

卷七十六

題跋二十一首

卷七十七

題跋十九首

卷七十八

題跋三十首

卷七十九

雜著十五首

卷八十

賦十四首

卷八十一

銘四首

贊三十首

偈頌三十七首

卷八十二

祝文五十六首

卷八十三

祭文三十五首

卷八十四

祭文二十四首

卷八十五

事略一首

卷八十六

行狀一首

卷八十七

行狀一首

卷八十八

行狀一首

行狀二首

卷八十九

行狀一首

卷九十

行狀三首

卷九十一

行狀二首

卷九十二

行狀一首

卷九十三

神道碑二首

卷九十四

神道碑一首

卷九十五

神道碑二首

卷九十六

攻媿集 目錄

神道碑二首

卷九十七

神道碑二首

卷九十八

神道碑三首

卷九十九

誌銘二首

卷一百

誌銘五首

卷一百一

誌銘五首

卷一百二

誌銘五首

卷一百三

誌銘七首

卷一百四

誌銘六首

卷一百五

誌銘四首

卷一百六

誌銘五首

卷一百七

誌銘五首

卷一百八

誌銘五首

卷一百九

誌銘七首

卷一百十

塔銘八首

卷一百十一

北行日錄上

卷一百十二

北行日錄下

臣等謹案攻媿集宋樓鑰撰鑰字大防鄞縣人隆興元年進士歷官參知政事除資政殿大學士提舉萬壽觀卒諡宣獻事蹟具宋史本傳其集載于諸家書目或作百卷或作八十五卷而世所傳鈔本有僅存四十餘卷者蓋流傳既久多所佚脫此本原作一百二十卷與宋史藝文志及陳振孫書錄解題所載相同猶爲舊帙惟中缺第七十七卷據原目爲宣王內修政事光武大度同高祖二賦玉卮爲壽宅道炳星緯二詩用人安民治兵策三道又缺第七十八卷據原目爲御試進士舉人召試館職閣職省試別試解試上舍州學諸試所擬策問十五篇又缺第七十九卷據原目爲宴會慶賀致語十五篇上梁文四篇勸農文二篇其第七十三卷據原目缺跋王伯奮所藏文苑英華跋清闕居士臨修禊序二篇第七十四卷據原目缺跋劉元城江諫議任諫議鄒道鄉陳了齋五諫帖一篇而第五十六卷中揚州平山堂記亦缺其後半諸家所藏刻本鈔本竝同今俱無從校補至第四十八卷第八十卷第八十一卷第八十二卷有青詞朱表齋文疏文之類凡一百六十七篇均非文章之正軌謹稟承聖訓槩從刪削重編爲一百一十二卷用聚珍版摹印以廣其傳鑰居官持正有守如請朝重華宮乞留朱子不附韓侂胄其風裁頗爲表表而學問賅博文章淹雅尤多爲世所傳

述本傳稱其代言坦明得制誥體葉紹翁四朝聞見錄載鑰草光宗內禪制詞有雖喪紀自行于宮中而禮文難示于天下二語爲海內所稱此言其工于內外制也本傳又稱鑰試南宮以犯諱請旨冠末等投贄諸公胡銓稱爲翰林才今集中謝省闈主文啓一首卽是時所作此言其工于啓劄也王應麟困學紀聞取其門前莫約頻來客坐上同觀未見書二句載入評詩類中此言其工于聲偶也而袁桷延祐四明志稱其于中原師友傳授悉窮淵奧經訓小學精据可傳信其言尤能盡鑰之實蓋宋自南渡而後士大夫多求勝于空言而不甚究心于實學鑰獨綜貫今古折衷考較凡所論辨悉能洞徹源流可謂有本之文不同浮議至于題跋諸篇尤原原本本證據分明毛晉輯津逮祕書摘錄宋人題跋共爲一集而獨不及鑰集其偶未見此本歟乾隆四十五年七月恭校上

總纂官內閣學士臣紀昀

光祿寺卿臣陸錫熊

纂修官翰林院編修臣查瑩

攻媿集原序

鄧山參政樓公攻媿先生文集一百二十卷。建安真德秀伏讀而嘆曰。嗚呼。此可以觀公立朝事君之大節矣。蓋公之文如三辰五星。森麗天漢。昭昭乎可觀而不可窮。如泰華喬嶽。蓄泄雲雨。巖巖乎莫測其巔際。如九江百川。波瀾蕩涵。淵淵乎不見其涯涘。人徒觀英華發外之盛。而不知其本有在也。慶元初。韓侂胄除知閣門事。忠肅彭公力諫。改侂胄內祠。彭公予郡。公在瑣闥。極論之云。去者不復待左右。留者召見無時。終不能遠。時侂胄之惡未著也。既而竊弄國柄。以黨論盡錮天下賢士。挑敵棄盟。中外騷然。天下始服公先見。朱文公侍經筵。內批予祠。公持其命不下。曰。當今人望儒宗。無出熹之右者。奏雖寢。然當邪說充塞之時。首倡學者。共尊朱公。後卒賴其言而學禁遂開。道統有續。然則觀公平生大節。而後可以讀公之文矣。公生于故家。接中朝文雅。博極羣書。識古文奇字。文備衆體。非如他人窘狹僻澀。以一長名家。而又發之以忠孝。本之以仁義。其大典冊大議論。則世道之消長。學術之廢興。善類之離合。繫焉。方淳紹間。鴻碩滿朝。每一奏篇出。其援據該洽。義理條達者。學士大夫讀之。必曰。樓公之文也。一詔令下。其詞氣雄渾。筆力雅健者。亦必曰。樓公之文也。嗚呼。所謂有本者如是。非耶。公既醫侂胄之鋒。退居卻掃者十有四年。嘉定初。起爲內相。俄輔大政。向來儔輩。凋喪略盡。而公巋然獨存。遂爲一代文宗。德秀嘗竊論南渡以來。詞人固多。其力量氣魄。可與全盛時先賢並驅。惟鉅野李公漢老。龍溪汪公彥章及公三人而已。念昔

校藝南宮。白事東府。或清言竟日。或極論達旦。德秀退而書紳。終身誦之。其所以猶爲當世善人君子所與。而不遂爲塗人之歸者。公之教也。公季子治以集序見命。德秀何敢辭。建安真德秀謹序。

攻媿集卷一

古體詩

宋樓鑰撰

攻媿齋

余以攻媿名齋。俞致翁惠書。謂若無媿可攻者。讀之悚然。不敢當。以詩謝之。

聖賢不得見。道散固已久。學者多自賢。鮮肯事師友。類冥聲利中。悔吝皆自取。動言無媿作。未知果然否。寡過云未能。先聖欣善誘。凜凜孟氏言。幾希異禽獸。參乎病知免。遂使啓足手。寧知起易簣。又在此段後。吾儕況小人。氣質素凡陋。以其所以養。孝道亦何有。勉前類水馬。立處祇如舊。倘復不自力。其末當愈認。每思攻所媿。扁榜銘座右。三誦故人書。慙汗幾欲溜。夫豈爲戲言。知君子我厚。因之更加謹。補過尙无咎。

謝湖山居士示和陶詩吳給事帶

淵明千載人。風節仰孤峭。豈惟辭督郵。蓬社不得召。書不求甚解。眼高得玄要。詩亦本無意。但寫胸中妙。齊梁紛衆作。嘈雜春禽叫。稚子候簷隙。文通劇接紹。矯矯玉局翁。尙友謝浮漂。飽喫惠州飯。追和欲同調。湖山老居士。宏才蓋廊廟。出入官五紀。懷歸自年少。屢廣歸來詞。吾行有先兆。老龍臥壑林。年高德彌劭。向來批勅手。甘心事耕釣。築室據仙居。泉石造深奧。亭榭望堂皇。蓬萊對圓嶠。涉園日成趣。遇客酒頻酌。

巖巖鸞鶴姿。炯炯雙眸瞭。墮體黜聰明。坐忘樂遺照。西疇時告春。東臯快舒嘯。襟期古暗合。此事不容詔。盡和靖節詩。筆走追風驪。又如裴旻劍。騰空徑投鞘。人生嗜欲深。山林不供燒。何當從公游。儵然竄荷蓀。小子敢言詩。未免事華影。西施難效顰。邯鄲恐貽笑。思欲焚舊稿。世味輕咀嚼。稍尋韋蘇州。旁引孟貞曜。絕去翰墨畦。毋鑿渾沌竅。尙或庶幾焉。未敢期速肖。

送袁和叔尉江陰

澄江少日曾經行。高城旁有長江橫。君山特立江之汀。下瞰淮甸一堂平。中港引潮深無聲。萬頃灌注滋農耕。戰國今幾二千齡。黃歇此地猶垂名。舊以邑屬南蘭陵。疲于奔命吏失靈。今焉裂地爲專城。獨當一面行雙旌。井市雖小民厚生。四十萬緡輸賦征。舶商輻湊衆貨贏。牒訴簡省官曹清。一邑負郭相依憑。守宰同僚齊弟兄。脈絡貫通易盡情。尉職無卑近編氓。坐閱是否真權衡。傍郡孔道因將迎。我乃靜趣如郊坰。安輿並行人子榮。況有海錯供庖烹。河朮鱗鱖鮮不腥。車螯蛤蟹均藜羹。夫君傳家有典刑。父子知己人一經。詩書滿門不慙卿。豈羨漢士黃金籛。薦口久已徹帝京。九萬自此開鵬程。平生寒窗照短檠。興亡千古無遁形。妙年射策當彤庭。歸領後生爲主盟。友朋講習誠專精。世故多端須飽更。京口直下連滄溟。官府闕稀行旅驚。邊頭久無夕烽青。要在彈壓潢池兵。簿書期會勤經營。人物酬應審重輕。一言行之可終身。謹毋失已毋失人。贈人以言豈吾能。願嘗于此三折肱。舉以送君君試聽。

瘦藤拄破山頭雲。山蹊盡處開危亭。平田萬頃際大海。海無所際空冥冥。乾端坤倪悉呈露。飛帆去鳥無遺形。蓬萊去人似不遠。指點水上三山青。褰裳濡足恐未免。倘有鸕馱吾當乘。是中始覺宇宙大。眼力雖窮了無礙。雲夢八九不足吞。回視塵寰一何隘。曾聞芥子納須彌。漫說草菴舍法界。看我振衣千仞岡。笑把毫端捲烟海。

林景思雪巢

四時不皆雪。陸居本非巢。高人興寄遠。表此一把茅。吾非二祖可。夜立寒齊腰。吾非烏窠師。結廬真樹梢。白日照我心。不以見睨消。兩腳踏實地。風雨無漂搖。作詩窮益工。寒瘦逼島郊。落筆句驚人。不復尋推敲。客至不問誰。淡若君子交。直氣千霄上。下視鄙斗筭。富貴頃刻花。疇能等幻泡。附離如幕燕。自謂漆與膠。先生閱世熟。兀坐山城坳。春陽會有時。豈曰終繫匏。錫山寄雄文。凜然豎髮毛。我非敢言詩。爲君聊解嘲。

題龍眠畫騎射抱毬戲

綠楊幾枝插平沙。柔梢裊裊隨風斜。紅綃去地不及尺。錦袍壯士斫鬢射。橫磨箭鋒滿分靶。一箭正截紅綃下。前騎長纓抱繡毬。後騎射中如星流。繡毬飛礮最難射。十中三四稱爲優。元豐策士集英殿。金門應奉人方倦。日長因過衛士班。飛騎如雲人馬健。駕幸寶津知有日。窮景馳驅欣縱觀。龍眠胸中空萬馬。駭目洞心千百變。追圖大槩寫當時。至今想象如親見。靜中似有叱咤聲。墨淡猶疑錦繡眩。閒牕撫卷三太息。五紀胡塵暗幾旬。安得土馬有如此。長驅爲決單于戰。

題羅春伯所藏修禊圖序

東遊登會稽。祇見蘭亭不見碑。北過中山府。欲訪此碑不知處。間從故家看墨本。如此二者絕難遇。曾經耶律氈裏去。至今薊北猶知慕。時將一二餽北使。持歸往往快先覩。未知玉石真在否。要比江南終近古。他日縛取呼韓作編戶。勒銘歸來過定武。只問君王乞此碑。打向人間莫論數。

題孟東野聽琴圖因次其韻

誰歟住前溪。夜深以琴鳴。天高顛氣肅。月斜映疏星。橡林助蕭瑟。泉聲激琮瑋。彈者人定佳。能使東野聽。東帶不立朝。遙夜甘空庭。龍眠發妙思。神交窮杳冥。不見彈琴人。畫出琴外聲。郊寒凜如對。作詩太瘦生。恨不從之遊。撫卷空含情。

壽安撫伯父

東樓德澤流無窮。我公挺生慶所鍾。瓊枝玉樹瑩精彩。迥然不墮風塵中。少年慷慨吐虹氣。文彩元不減。儕輩胸中妙蘊經。綸才剗劇裁繁特餘事。曾從蓮幕試牛刀。舉城但識劉功曹。瀾翻薦口動天聽。一語便逾華袞褒。上方欲革嶺南弊。東才果得吳刺史。不妨一勺飲貪泉。清德泠泠今可紀。憑軾雍容安七閩。列郡合詞稱得人。從茲十載乘麾節。坐令萬里回陽春。洞庭風月瀟湘雨。君王無復憂南顧。抗章乞得半生閒。遙指山家賦歸去。廟堂未肯閒宏材。大開東閣需公來。朝隨召節赴天闕。夜馳使駟歸長淮。廣陵臥治要汲直。金節熒煌照熊軾。底用腰纏十萬錢。且看身享二千石。忽思鱸膾寒菰羹。拂衣欲遂鄉關情。視去

西陽如脫屣。意色蕭然同鬪生。畫船重汎西湖上。水光山色都無恙。主人管領東風回。故園桃李倍清爽。六龍背負三山歸。輪囷老檜蒼龍姿。了無塵俗敗人意。斐几長物皆瑰奇。橫岸綸巾披鶴氅。神情直出羲皇上。塵事到頭曾不聞。臥聽歌臺傳緩響。百花堂前手自栽。興來一杯復一杯。人生亦欲自適爾。富貴于我何爲哉。仲春況屬懸弧旦。使君亭榭風光煖。東君豫借一分春。不許芳菲作春殿。綺羅香深初肆筵。弟兄酬酢盃相傳。此時更復借一醉。君從何處并垂蓮。五侯貴盛德未美。簪纓不滿高陽里。何如清白傳家風。奕世青氈盡朱紫。燕居今喜相比鄰。其如四海須陶鈞。羽書鼎來在朝夕。何數羔雁徒成羣。芙蓉城中有仙宅。十洲三島環其側。此中樂不減商山。功成歸作茹芝客。

送伯舅汪運幹大雅

人生自古悲別離。別離今日何足悲。試問今日行者誰。鄞江名族真男兒。虬鬚燕領軀十圍。凜凜端有熊豹姿。毅然剛立不怒威。笑視鼠輩何脂韋。州縣小試囊中錐。政績今在衆口碑。姓名通籍黃金閨。便泛王儉紅蓮池。平時幕府多素尸。坐糜公粟邀以嬉。只今方當多事時。正要名士同驅馳。森森百萬虎與貔。荷戈分駐淮東西。兩淮千里雙使麾。幕中僚吏皆耀犀。惟公婉畫明著龜。辯如懸河不可隄。胸中武庫深難窺。決策固有堂上奇。朔風吹空黃草齊。正恐秋高胡馬肥。萬人相顧目睽睽。見公此去多腹非。公獨襟被行不疑。單車西去征馬嘶。平生氣槩衝虹霓。恨無尺箠笞羌夷。方今天相中興期。黠虜戴頭來邊陲。願公速蹈功名機。匈奴不滅何家爲。出門千里何足辭。但願滿引金屈卮。

月夜汎舟姚江

秋暑不可耐。幾思汎中川。晚來興有適。溪船偶及門。涼月纔上弦。平潮可黃昏。倚楫縱所如。臥看龍泉山。長虹跨空闊。過之凜生寒。坐穩興亦佳。夜氣方漫漫。草蟲鳴東西。飛鳥相與還。仰頭數明星。垂手搖碧瀾。主客惜此景。不及攜清樽。無酒要不惡。徜徉足幽歎。幽歎有何好。扣舷澹無言。

送王正言守永嘉

江頭潮生江月小。暝烟綠暗垂楊道。有客扁舟送使君。道傍不怕挪揄笑。向來一別三換歲。正喜親情得傾倒。吏民引領望推麾。空有離愁滿懷抱。使君讀殘萬卷書。古事今事俱了了。便應珥筆侍天陛。不然代言登鳳沼。瀛壖山水久寂寥。爲屈朱轡來坐嘯。幘幘峰高舊題咏。赤城所在經行飽。永嘉名郡太守尊。靈運後來詩絕少。天作雁蕩地爲藏。蠟屐穿山未曾到。改轅卻向箇中去。更得江山助詩好。齋鈴靜處定得句。不待池塘夢春草。去年海水上平地。大風駕浪從天杪。蒼生濺濺生魚頭。聚落隨波迹如掃。今年二麥連野秀。田家扶犁事秔稻。使君憂國眉不開。叱馭徑行仍及早。哀哉千里方更生。縣官租錢酒戶曉。縱民自恐上不足。誅取何憐下無告。邦儲邦本孰輕重。肯使疲民困征擾。君不見巖巖千古陽道州。政拙催科自書攷。

遊龍瑞宮

隔山望危石。老面凜如鐵。路回兩屏開。見此高巒嶮。偉哉名公卿。峩冠會朝列。又如鼓迅霆。玄雲助擊烈。

癡雲不作雨。空翠襲冰雪。野水不知源。遶徑幾萬折。子長真愛奇。萬里探禹穴。我家甬水東。扁舟輕入越。竊此半日閒。到處輒清絕。傳聞古洞天。瓊臺照金闕。神仙杳難問。一笑山石裂。相逢客路中。翻手數年別。勝地更躋扳。莫厭屐齒折。

三日不得過都泗堰

南朝何公棲禹穴。嘉遜悠然老高潔。一朝送人都泗埭。歸歎此途于此絕。我亦何爲走塵埃。數年不記幾往來。船橫三日不得度。愧想高風安在哉。

宿佛日山

平生臨平山。知誦藕花句。輕帆幾來往。山色澹如故。寧知千萬峰。中間著佳趣。蕭蕭蒼髯翁。爲指花城路。我來春正濃。天寒日將暮。雲深鐘唄鳴。自喜得勝具。緬懷玉局仙。老筆掃朝霧。玉槩儼相持。珠旒竟何所。惟餘渥洼水。蒼龍角牙露。人間翻覆手。烈日變烟雨。俗子眩炎涼。三四錯賦芋。道人笑視之。萬化隨所寓。深坐十笏地。一息了千慮。箇中誰得知。幽鳥背人去。

求仲抑招遊山歸途遇雨

竹輿遶湖濱。宿露尙厭浥。徑到玉岑下。坐久客始集。起穿靈石山。萬松介而立。梅天氣清潤。空翠行可挹。古藤幾百年。枝蔓兩山及。見說暮春時。花紫光熠熠。直疑老潛虬。初起夜來蟄。俯玩歲寒泉。齒冷不敢吸。相將上龍泓。塵鞅謝羈屣。洞有靈獸居。臨深心岌岌。魚遊明鏡中。巨浪無三級。寒苔載水去。萬頃潤原隰。

巖嶽山雨來。歸僕鳥飛急。野興殊未已。日昃不暇給。衝泥上湖船。雨陣遽奔襲。飄風將急點。回旋驚四入。中流益蕩兀。短篷不營笠。停篙亦久之。怒勢不少戢。我徒方嘯歌。弗謂改豪習。但恥瓶罍罄。莫問衣裳溼。

吳江舟中

阿連久矣共一被。小別愁生夜無寐。風帆將我上征途。回首江山日千里。小舟橫臥吳江水。夢回依約蕭齋裏。五更漏急月黃昏。鳥散一聲人未起。

讀范吏部三高祠堂記

三高之風天與高。三高之靈或可招。小山以後無此作。具區笠澤空寥寥。幾從垂虹蕩雙槳。寓目滄浪獨招恨。筆端不倒三峽流。欲遽招之恐長往。前身陶朱今董狐。襟抱磊落吞江湖。瑰詞三章妙天下。大書深刻江之隅。我來誦詩凜生氣。若有人兮在江水。扁舟獨釣膾鱸魚。茶竈筆牀歸南里。先生同是丘壑人。只今方迫功與名。謝公捉鼻恐未免。便看林藪生風雲。他年事業滿彝鼎。乞身歸來坐佳境。不嫌俗士三斗塵。容我漁蓑理烟艇。

仙都獨峰

漢家武微求神仙。方士搃掌多夸言。蓬萊隔海不可到。屬車徜徉上橋山。傳聞黃帝久仙去。胡爲有石高噴。旣游談不經理。欲屈謾言此地藏衣冠。縉雲自是仙窟宅。萬壑千巖比如櫛。突然一石摩青雲。造化應勞巨靈擘。仙風吹墮碧蓮花。玉井半空人不識。望之不計幾千尺。八柱擎天此其一。伯夷制行高且孤。萬

世猶能立懦夫。英魂凜凜今不死。化作此石山之隅。橫斜轍跡依然在。我亦何能窮古初。

靈壁道傍怪石

飽聞茲山產奇石。東南寶之如尺璧。誰知狼籍亂如麻。往往嵌空類鑿刻。長安東南萬歲山。搜抉珍怪窮人間。汴流一舸載數輩。徑上良嶽增屏顏。當時巧匠斲山骨。真之江干高突兀。干戈動地胡塵飛。坐使奇材成棄物。君不見黃金橫帶號神運。不數臺城拜三品。只今零落荒草中。萬古淒涼有遺恨。木人漂漂不如土。坐閱興亡知幾許。行人沈歎馬不前。石雖不言忍能語。

括蒼溪漲

雨餘大溪觸山流。氣勢直欲凌沙洲。浮梁中分斷蟠螭。流沫東去行蛟虬。人家嘈嘈避新漲。雲稼苒苒添平疇。漁翁輕生有如此。小艇橫絕隨飛鷗。

石門洞

扁舟百里連城回。青山中斷立兩崖。清都虎豹隱不見。但見閭闔排雲開。峯回失喜大飛瀑。聲震萬壑驚春雷。掀髯目極九霄外。玉虹千丈飛空來。一冬青女斬天雪。不知聚此山之隈。傳聞神龍臥其上。寶藏擊碎真瓊瑰。胷中先自無塵埃。到此更覺心崔嵬。天風爲我噴空翠。春水瀉入騷人懷。謫仙曾來寫勝句。劉郎又爲開天台。我慚筆無挽牛力。醉墨滿壁誰爲裁。或言龍湫更奇絕。鴈山高處深雲埋。我方攜筇往尋訪。未知比此何如哉。

大龍湫

北上太行東禹穴。雁蕩山中最奇絕。龍湫一派天下無。萬衆贊揚同一舌。行行路入兩山間。踏碎苔痕屐將折。山窮路斷脚力盡。始見銀河落雙闕。矩羅宴坐看不厭。騷人弄詞困搜抉。謝公千載有遺恨。李杜復生吟不徹。我遊石門稱勝地。未信此湫真卓越。一來氣象大不侔。石屏倚天驚鬼設。飛泉直自天際來。來處益高聲益烈。溟池倒瀉三峽流。到此誰能定優劣。雁山佳趣須要領。一日盡游神惡覓。驪龍高臥喚不應。自媿筆端無電掣。輪困蕭索湍不怒。非霧非煙亦非雪。我聞凍雨初霽時。噴擊生風散空闊。更期雨後再來看。淨洗一生煩惱熱。

連雲亭望海中諸山

雁山本在雲海中。波濤千古相撞舂。泥沙洗盡見山骨。巖壑所在皆玲瓏。是誰一口吸水盡。平地卓立成奇峯。至今往往有遺跡。相傳渺漭何能窮。我乘單車來自東。佳處十數一覽空。晚登四十九盤頂。曠望巨海烟濛濛。羣山錯立不知幾。朝日照耀天霞紅。是間瑰奇定多有。鯨波掩蔽深莫通。我無太真燃犀法。安得一闖馮夷宮。會聞滄海變成陸。卻與雁山爭長雄。

寄題張法曹瞻雲軒

張侯名軒意可知。如登太行看雲移。我雖未得登軒墀。不鄙要我巴人詞。爾時膝下邀以嬉。欲斷數語語不隨。娛侍東嘉樂無涯。官舍偪仄親不怡。安輿相將甬水湄。日日東望勞支頤。秋風得檄欣星馳。歸拜親

下聊信眉。官事有程不得違。欲去故國行遲遲。重來橘柚黃金垂。霜著新蟹雙螯肥。海魚甘鮮一尺圍。欲奉色養春爲期。瞻雲之思今同之。慨然落筆成新詩。人間至樂在庭闈。何用自縛微官爲。君方欲解左顧龜。我亦日思投檄歸。相望百里俱萊衣。從他天外閒雲飛。

次韻翁處度同遊北山

兩夫持鎌行我先。巧尋徑路其智專。我扶枯藤衣短後。意氣已出層峯巔。何郎鮑叔飽經歷。勝處一一手自編。我攜舊紀訪陳迹。止恐急景不得延。徜徉共登青雲梯。今日邀我爲擊鮮。始觀神龜闖青泚。上有石壁來飛泉。隱蹟遺基平可坐。下顧亂石如磨鏡。懸崖雙瀑灑空雪。來自一握孤雲天。卻從下流泝深險。崎嶇直到青潭邊。朝陽射光破幽闕。斷虹上下遮潺湲。傳聞高山更高處。雅有行路從西偏。同行無乃深好事。盃酒自犒腳力全。誅鋤荆棘窮鳥道。欲進不得意愈堅。旋呼童僕累危石。笑採野菊聊盤旋。捫蘿騰身上苔磴。往往歡呼爭著鞭。側行危步汗浹背。石角或使衣裳褰。少焉身在雙瀑上。又見高派衝泓淵。自笑泉石成膏肓。愛賞不減蟻慕羶。巉巖數峯巧遮護。妙處二老初無傳。脫迹塵埃到此地。便覺神思飄飄然。回首江南塵一聚。城郭歷歷眼欲穿。相看水流處。步履未倦夸輕翩。一上千尺窮山椒。碧澗靡迤流蒼烟。尋源不能且忘返。石狴巍距驚神鑄。退求歸徑惘難問。藤蘿所在相縈纏。我方踟躕風烟表。披披衣袂身欲仙。晚歸招提各痛飲。讀盡屋壁長短篇。截筒環山覽清駛。竅出珠穗心亦憐。棊枰相與論瓜葛。橫琴不妨揮五絃。人生易老費扶掖。勝具大率須少年。伊余歷聘佳山水。愛奇切慕太史遷。明年炎暑襲故

步與君共枕清流眠。

遊白石巖

我遊仙都觀獨峯。轍跡雖在車不通。鼎湖望極幾怳悵。悵無羽翮凌天風。茲來樂成望白石。玉甌突兀摩蒼穹。人言真人老聃裔。鑿開洞府遺仙蹤。無人共登青雲梯。躋攀伴我惟枯筇。縈回約略三十里。踏遍萬壘高巖。窸斷崖冷落殘雨。雙石凜凜亭孤松。卻從山椒下谷口。石欄屈曲遮碧櫺。頗疑山高氣凝凜。古來積雪今未融。是誰玉斧妙鑄斲。仙洞雙闢驚神工。巖深白日尙幽闕。別有石竅開天聰。傳聞峯頭貯清泚。苔罅涓滴聲冬瓏。奮身更與上虛閣。海山錯立烟濛濛。脚底千山行伏龍。手揮五絃俯冥鴻。霜林搖落當玄冬。長嘯一覽萬象空。解衣寄宿旦過寮。魂夢亦墮冰壺中。曉看日出滄海東。蠟炬百萬燒天紅。眼高不數雁蕩雄。行田下笑康樂公。未能辟穀追仙翁。頗亦有意棲琳宮。三山不覺去人遠。安期羨門宜相從。嗚鶴駕鶴太多事。但欲御氣遊無窮。

約諸公再遊龍湫

昨暮與君上龍湫。天久不雨無湍流。笑呼拊掌喚不應。悵望頗亦令人愁。夜來雷鼓驚龍起。溪聲已覺亂人耳。莫辭重訪尊者居。坐看倒翻三峽水。

送劉仲起主簿

劉郎鸞棲海瀕邑。不減向來人性習。凜然軀幹卽之溫。語恐傷人中有立。論交雖厚笑甘醴。御史以嚴無

東溼公餘黃卷頻卷舒。藝圃工夫日加葺。永嘉數多君子僚。休沐新盟有清集。伯倫忽去誰鯨吸。欲挽不留情悒悒。君年方盛才有餘。逸驥寧容在羈羈。期君欲蹈功名機。塞草連雲朔風急。

王侍御壽詩

使君威名聞四方。南牀凜凜凝秋霜。使君和氣到甌越。幕府初開夜飛雪。頗聞此雪近歲無。定知來隨御史車。黃堂洗印未多日。慶朝況此當懸弧。明年豐登日可數。父老兒童爭起舞。遲明賀版擁譙門。試拾歡謠作詩語。使君風度神仙人。相門出相寧非真。妙齡兩科談笑得。脫趨嚴召依風雲。臺端敢言姦聽聳。至今議論時傳誦。踏遍巫山十二峯。卻尋春草池塘夢。人傳使君威稜稜。我知威愛元兼行。蒼髯如戟面如鐵。惠養自有循良稱。高牙入境紛進謁。賓屬庭趨躬磬折。民生共喜愛日溫。吏行獨畏春冰裂。向來夔州妙籌邊。夷蠻落膽皇靈宣。還朝奏課居第一。夜半帝席爲之前。東嘉今爲股肱郡。小試望之三輔近。會循故事入三公。致君要使登堯舜。東風未動春先回。梅花照眼歌筵開。吏民合詞誦難老。一笑千里傳銀杯。佳兒恂恂授衣鉢。玉樹芝蘭俱秀發。江南世胄比長淮。更看雲來萃簪笏。平生知己今上天。敢復坐歎寒無氈。巴言未足贊公壽。載誦峻極崧高篇。

鮑清卿病目不赴竹院之集詩寄坐客次韻

鮑侯年少老文學。藝苑優游富耕穫。胸中涵養自成趣。妙處正恐兒輩覺。我慚門巷非尺五。字欲問奇誰與摧。開樽竹院望同醉。遮眼腦脂何太虐。團圓十客踏雨來。相從不負東風約。投壺雅歌了無恨。祇恨車

公一前卻。海棠春深照眼明。風物融融悟非昨。從教雨洗胭脂淡。小摘何妨供把握。夜闌燒燭照花睡。靚妝如在結綺閣。牆頭西望爛蜀錦。嫣然一笑無聲樂。飛紅點地繡作茵。正須席地天爲幕。要知富貴出天姿。艷杏夭桃何足錄。主人小築真好事。肯學區區專一壑。洞門不鎖要客來。笑君太似羊公鶴。雨餘珠淚色慘悽。一顧正嫌無伯樂。忽驚新詩來叩門。妙語天然不煩琢。坐中傳觀字欲漫。我豎降幡甘面縛。清明已過雨不休。雲霧猶屯四山脚。揩摩病目不應遲。及此紅英半零落。枝頭尙有未開花。縱已離披亦何惡。知君旣負西岑游。可使一春終落寞。會須來此共賦之。正要重聞誦新作。

贈光孝益老

光孝長老師益。蘇魏公諸孫。兄延壽爲台州判官。別四十餘年。一見歡甚。林吏部有詩次韻。

原鴿鴻雁行。此理懸諸天。萬事可變滅。天性難推遷。顯庵幼出家。潔飲同玄蟬。一鉢寄西東。悠悠經幾年。外慕等浮雲。百念灰無烟。難兄忽相逢。觸動歡喜緣。光陰信可惜。征袂何翩翩。叱胥掩簿領。來問妙峯禪。刺刺道家世。客淚如迸泉。玉堂與黃閣。衣鉢親相傳。游宦非爲貧。不敢替所先。老師雖晏坐。至情豈唐捐。此會非偶爾。絕倒秋風前。手持詩卷來。謂予得無言。曉以天性語。人生要有原。嗟哉僞日薄。其豈本同根。一旦成讎敵。釜中急相煎。寧知有佳人。芳草夢阿連。相見無幾時。譬如魚躍淵。固知出世法。惜別詎不然。又當作大觀。勿爲愛網牽。千山元不隔。毋庸對牀眠。

送王道州

九疑之南爲舂陵。瀟水清駛山爲城。郡齋正據山直上。一覽萬家無遺形。家君頃年入蓮幕。我不得往空馳情。先生分符此中去。心旌搖颺隨雙旌。先生平生飽文學。身上著作承明庭。奧篇隱帙亦如響。一時自許文章鳴。高辭坐奪造化巧。凜凜韶濩聲鏘鏗。把麾江海非無意。親扶板輿賦南征。頗聞楚俗未蘇息。糟糠不厭嗟疲氓。正資儒術飭吏事。拔去強莠摩孩嬰。政成環召事未晚。天子日夜開延英。風流千古三刺史。往繼聲叟陽先生。毋庸自書追科攷。但願寄我舂陵行。

哭王知幾墓

知幾少也爽。萬事笑談了。自謂頗寡合。見我輒傾倒。百年能幾見。一別迹如掃。父子俱埋璧。嗚呼何其早。向來論文酒。和淚傾宿草。此意誰復知。寤歎令人老。

仲舅尙書生朝

去年生朝燕稽山。館舍朗朗屋百間。紅裙合樂飲徹旦。坐上衆客皆酩酊。今年生朝半歸路。竹輿瀟瀟曉衝雨。回頭風景非去年。當時賓客今何處。仕己喜愠曾何分。適齊未減楚子文。鼻間栩栩固自若。世情物態徒紛紛。平生知足志閒退。歸老鄉關了無悔。但欲年年醉西風。坐閱人間百千歲。人間萬事日不同。尙書人望方顯顯。明年舉酒拜公壽。安知不在槐庭中。

送鄭惠叔司封江西提舉

君名切斗魁。步武上霄極。蓬萊羣玉府。圖書照奎壁。郎官應列宿。寢覺象緯逼。胡爲作使星。炯炯向江國。

仰奉鶴髮親。板輿映萊服。昔日紅蓮池。帥垣資婉畫。方將散餘潤。連城被膏澤。官權與民蘇。豐儉煩振糶。小試活國手。疲氓賴休息。便歸侍玉皇。拱立香案側。富貴殊未已。行行上鸞掖。君其妙演綸。三能看齊色。

次韻胡元用茉莉花

殘暑未盡秋欲來。玉刻萬葉瓊英開。孤標雅韻一枝足。江上繁翠空成堆。素娥常與明月約。青女細把輕綃裁。主人好事趁時買。買真此地真宜哉。牆間閒地方丈所。幾年累甃裝層臺。春花秋卉紛互發。胡葵芍藥參徘徊。眼明忽見此奇絕。弟畜素馨兄事梅。夜深飛香性幽獨。未許蜂蝶來相陪。糖甃封餘有閩土。會須掃取添花栽。吾聞閩山千萬本。人或視此齊蒿萊。何如航海上天闕。玉色照映瑠璃盃。新涼徙倚看不足。坐見日影敲庭槐。

同官登勅局小樓觀雪

去年歲豐登。雨暘應時須。所欠惟一雪。祈禳遍精廬。晚亦粗飄瞥。六花舞空虛。雲氣不待簇。風伯隨驅除。殘春寒尚深。忽見雲模糊。撒鹽壓衡茅。晨興粟生膚。隨班上廊廟。恍若登蓬壺。岩曉宮殿深。朱扉黃金鋪。百神衛靈居。半天散瓊瑤。又疑守護嚴。寶網絡明珠。參差鴛鴦行。簪笏皆沾濡。退歸冷局中。牕間竹扶疏。爲思此絕景。往往終年無。不應憚凌寒。閉門守紅爐。爲君登危樓。深盃泛醅酥。崔巍瞻吳山。莽蒼望西湖。瓊枝宿饑鷹。玉階走韓盧。酒興萬里遠。容我歌且呼。坐欲斲五言。所媿李與蘇。君與工屬聯。灞橋去騎驢。久不作詩。喜仲兄遷鄰居。因成長句。

宦游各天涯。皇州今雁行。官居半里所。相過復相望。西鄰得老屋。往來連戶牖。水竹占幽勝。風雨對一牀。十年短檠燈。今夜分餘光。兒曹亦可樂。洛誦聲洋洋。天邊有白雲。隨風正飛揚。相期奉甘旨。萊衣戲親傍。軒冕皆儻來。此意可暫忘。詩成喜可知。且復酬此觴。

送林宗丞浙東議幕劭

先生風骨天與清。孤松野鶴何瘦生。胸中落落筭五經。大篇短章筆縱橫。壯年文場諸老驚。俯仰世故雙鬢星。萬事不理詩自鳴。笑視軒冕秋毫輕。市者爭利朝爭名。著腳往往遭譏評。先生四五官神京。又復歸去鴻冥冥。臺家急賢理不應。況復寮舊離觴傾。先生自喜得此行。祿粟可已啼號聲。秦望之山高且平。臥龍橫亘環州城。鏡湖千頃波不興。晉宋遺跡多豪英。議幕了無塵務縈。撫物弔古皆關情。我亦久矣懷滄溟。旦夕欲乘緹油屏。相望縱復三四程。詩筒尙得尋前盟。

臨海縣治琴堂

子賤彈琴真是琴。我今無絃知琴心。使我不得琴中趣。弦以脩綆誰知音。才術高低不自由。單父二子心則侔。後人不得彈琴暇。勿以戴星爲可羞。

送石應之司戶歸剡以室邇人遠爲韻

捷徑指終南。索價讓少室。窮達豈無命。踏地胡不實。之人吏海隅。所吐百未一。夷途澹無營。君其有終吉。年來歎離羣。磨琢殆無幾。資凡學益落。駑駘費尺筮。羨君富春秋。發軔方自邇。驂騑更著鞭。洗眼日千里。

南明千古秀。慶源久益新。剡溪照人清。況復屈斯人。摻袂不容畱。椒觴思拜親。他年風雲中。扁舟倘知津。平生企賢心。山川恨悠緬。寧知日相見。懷抱竟不展。樽酒了無暇。離情果深淺。室邇猶許疏。況今乃真遠。

送王仲矜倅興元

蜀道難。難于上青天。蜀道易。易于履平地。蜀山天險固自若。視難爲易在人爾。王尊真有四方志。叱馭徑行了無累。早登岷峨仕陰城。談笑動行千萬里。漢中由來說雞肋。意謂棄之爲可惜。君今此去良似之。更欲遠遊尋故迹。漢都南鄭啓炎圖。秦置石牛山徑關。淮陰拜將餘高臺。武侯葬處空松柏。大笑出門何慷慨。天涯離愁各盡觴。荷君走馬卻送我。李侯參語夜未央。君方往蹈功名機。何止別駕歌王祥。先正九年遺愛在。更攜故笏訪甘棠。仲矜象簡。乃參政入蜀時所用。

巾山

兩麓最屬隨。西行勢欲吸。盡西江清。是誰繚以千丈城。欲去不去豈不靈。化爲青山鎮東溟。首冠宰堵雙峰嶸。安輿從東喜逢迎。笑指麓背同來登。春殘雨足綠陰成。山鳥相和聲啾嚶。自從半山經小亭。仰望巨石扶軒楹。千山萬山擁翠屏。陰霾歸靜織雲興。翠微下有長江橫。滾滾不盡千古情。橫軒俯瞰萬瓦平。佳處歷歷堪指名。雪蓬蹙雲連曲肱。蜂房蟻垤棲殘僧。扶欄更上三兩層。一覽物衆無遺形。徙倚未厭茗椀傾。長嘯兩腋清風生。親顏甚怡輪爲停。我亦色笑喜不勝。願我雙親俱遐齡。方瞳鍊顏華髮星。如此兩峯相對青。

沿檄柯山歸別張特秀

我昔志學年。侍親宦西安。弟兄遊庠校。見君平生歡。君才獨穎出。逸駕不可攀。夜牕共檠燈。春遊合盃盤。虛堂臥雪嶺。傑閣橫雲檠。爛柯上危磴。烏巨沿溪灣。是時氣相高。辨論俱瀾翻。一別三十年。天街見峩冠。殿廬看決科。藍袍立清班。黃牒墨猶溼。大弨力能彎。爾來又五載。短書能幾番。茲焉捧檄來。吏牘方掣煩。室邇嘆人遠。一朝脫籠樊。滿意縱劇談。痛飲到夜闌。十步九太息。此事亦孔艱。進哭老先生。畫圖慘青綸。特顯顧何爲。一昔成大還。回思我伯氏。人琴有餘嘆。感今念疇昔。相與涕淚漣。故人悵無幾。恍如春夢殘。有酒不得飲。有琴不成彈。復歸坐冷屋。使我凋朱顏。我歸不可遲。倚門夢連環。君言欲春糧。伴我行路難。欲去不得去。僧坊話閒關。年各幾半百。後會鬢亦斑。何處更有待。此心匪石頑。羣憂發孤笑。屬聯不當慳。氣岸有如君。著身簿尉間。鹽車復長鳴。會當上天閑。摻祛不忍別。雨聲爲潺潺。君有門戶責。慙慙願加餐。

次韻沈使君懷浮岡梅花

玉人迴立山谷裏。不有使君誰與憐。毋庸高牙煞風景。爲著佳句增孤妍。寒溪照影漫千樹。橫笛吹殘又一年。傳聞年後更多發。便須躍馬趨平川。

送王木叔推官分韻得錦字

王郎天下士。中和自生稟。澹然初無營。見者輒斂衽。幕中資婉畫。處事極精密。與人如恐傷。律已淵冰凜。深恐馬駛輿。要使鶡食葦。一寸憂國心。幾年不甘寢。此意大未酬。退靜若已甚。使之行所學。庶幾人奠枕。

向來孰問之。未免斯立噤。川泳而雲飛。賴有東陽沈。露草極推轂。分韻句裁錦。風流有如許。不復嘆踔躡。如君豈蓬蒿。人物妙流品。才應奉香火。爲養謀祿廩。與君幸瓜葛。心交今十稔。豈惟我惜別。行道情苒荏。紅蓮色何似。翠柏風愈凜。願君疏藥裏。一意護茵飴。棄鼎寶康瓠。浮名如拾藩。行矣無多言。臨歧且劇飲。

彭子復臨海縣齋

乾道癸巳冬。此邦我經行。鬱攸氣未殄。千家真赤城。來訪臨海令。瓦礫紛縱橫。翹然二尺高。問是戒石銘。徘徊重太息。更聞愁嘆聲。試詢來者誰。共言令姓彭。我時語傍人。此邑其將興。迨予來贅倅。客館方暫停。夜聞簫鼓沸。廳事先落成。起望輪奐美。壯觀聳連甍。百堵日已作。斧斤喜丁丁。層樓庀敕書。兩廡環中庭。久乃遊其間。宏大使我驚。位置既深穩。斲削仍工精。田里不知役。織粟無輸征。安得屋朗朗。突兀有靈馨。退食不苟處。扁榜皆佳名。中虛物自照。政平由心平。樨柏已可悅。況有賢弟兄。小亭真吏隱。縣擁高山青。琴堂雖增舊。此意宜細評。智調天下理。夸言笑後生。大弦可以急。小弦恐弗勝。舉意屬俄頃。立欲如所營。手足民無措。吏姦益相乘。不如陳節目。示以信與誠。施行有次第。幽遠無隱情。上下始相應。溫和亮以清。子賤意不傳。僅許勝戴星。彭令蓋得此。所以千里稱。此非以政學。淵源甚分明。行笑解印去。衆心已先傾。太守薦之朝。一鶚飛青冥。傍無蚍蟻援。日夜思歸耕。我無薦賢柄。直書氣填膺。安得採詩官。取以徹明廷。

送虞仲房赴潼川漕

我來丹丘乘貳車。送客往往萬里餘。盛山使君別寢久。漢中郡丞今寄書。公指四明喜鄰境。典午何知成。


畫餅揚旌忽作梓潼行。去路六千抑何迴。餘杭名家多俊奇。君子輩行尤白眉。雍容音韻足夷曠。百家到手無停披。向來郎曹天咫尺。引身閩山接商舶。賈胡嘆仰清節高。霧中親見越王石。此行叱馭不作難。手遮西日又長安。長安日近公應往。未放使星臨蜀山。不然一行亦不惡。潼川應如錦城樂。鄧侯功名凜如在。拾遺風采今猶昨。流馬木牛諸葛公。飛輓正欲修前功。蜀民險遠日凋瘵。摩撫要令畿甸同。況公五絕追鼻祖。隸古真有兩漢風。歸來富貴固未晚。爲傳此學川西東。

奉口遇雨

七月欲盡八月初。天久不雨暑未徂。下田焦卷上田槁。愁嘆不止田間夫。嘔啞水車日夜響。漕河揚塵成坦途。喜見此溪深且廣。玄雲忽起西北隅。林間槭槭水漚起。兩岸人物歡欲呼。未聞滂沛潤龜坼。且使萬物聊沾濡。船牕飄灑疏篷漏。客意自適涼襟裾。引身東望雲氣薄。未知帝城有此無。傳聞今日方奏告。便有響應來斯須。人家百萬苦炎熇。君王齋禱幾月餘。君王齋禱幾月餘。雲師雨師其疾驅。

游天台石橋

兩龍爭欲起深壑。觸破山骨成修梁。滔滔共出一門去。凜凜直落千丈強。初疑鞭石跨滄海。絕勝乘鶴橫銀潢。要須高躡前峯過。往叩山中眞寶坊。



攻媿集卷二

古體詩

史少師賜第賞芍藥分韻得木字。

帝城有僊山。雙徑森萬玉。洞戶入深窈。突兀見華屋。相君領衆客。紅藥想芬馥。霜刀妙裁翦。臙脂點冰穀。枝弱不勝花。翠葉共斜矗。向來爭春風。桃李媿粗俗。百卉紛何在。庭樹擁新綠。此花丈人行。儼立見幽獨。相君戴花笑。和氣俱可掬。人言此花勝。相君意傾屬。誰知心廣大。何物不蒙福。豈以庭中花。而肯棄凡木。君看擇勝具。所在可追逐。自言居閒時。情話會親族。一花有可觀。爛賞費銀燭。此心何揀擇。寓意本無欲。以此宰天下。以此鎮藩服。兒童與走卒。人人歌相國。有能達此觀。春風四時足。

送錢伯同寺丞守嚴陵

嚴陵錢使君。丐外得請。外府同僚相與飲。餞于錢塘之津。某病疹弗得預。方得請之初。某歎曰。去年送君來。今年送君歸。君笑曰。此卽送行詩也。臥病枕上口占。

去年送君來。今年送君歸。君善全去就。我獨念別離。君是忠孝家。襲紫傳金龜。門戶二百年。所寄在一夔。少年便老蒼。況今更險夷。不獨妙言語。理窟深莫窺。健筆照手澤。典刑從可知。向來御祥琴。欲把江海麾。

促召歸舊班。退食方委蛇。世事等飄瓦。人情嘆然其。向非渾金質。百鍊豈不衰。浩然賦歸歎。潔身而去之。爲寮曾未幾。棄我忽若遺。君旣棄我去。謫僊復追隨。陡去一良友。摻袪重分歧。前別易再會。後見當何時。才具素絕倫。涵養日以滋。且爲牧嚴陵。赤手摩瘡痍。歸來應不晚。青氈當屬誰。願君厚自愛。歲寒尙相期。

送楊嗣勳校書守眉山

我生東南陬。不識蜀道難。觀君眉宇秀。想見岷峨山。漢廷射策時。連壁照鸞班。伯氏書萬言。逸駕不可攀。茲焉從君游。頗得窺一斑。僊凡隔弱水。接辭良亦艱。矧茲萬里別。望望何當還。三蘇騎鯨去。詞章滿人間。豈無後來者。遺珠有餘歎。願君效樂全。飛章達天關。報國此最急。餘事付等閒。宣室行見思。朝暮當予環。別語敢言詩。屬聯不容慳。

送何道夫祕監守潼川

妙齡冠蜀士。名聲振王畿。晚隨召節來。天朝增羽儀。我昔倅丹丘。鹿侯掛冠歸。羣公俱祖送。見公四三詩。頗恨著鞭先。自言乞身遲。拳拳慕下風。直欲夢見之。還朝挹高致。氣宇清且夷。稱者不容口。往往同一詞。始見荷傾倒。笑談欲忘疲。況當秋風高。濫吹參試闈。鼎鑪得一嘗。豹斑容管窺。叔度真似道。莊生信忘機。親疎皆不可。況容磷與緇。諸生得公來。歡曰真吾師。叩簾或三請。響答了不疑。私謂如此人。定應備論思。胡爲歸興勇。抗章氣不衰。鼓盆萬里外。抱孫更成悲。擁麾東川去。無人留孔戣。別懷不自勝。別酒聽淋漓。他時念老成。追鋒且復西。公能重來否。此意非吾私。

送趙子直貳卿帥出山

一蹴登從班。人胡謂公遲。建牙帥七閩。人胡爲公疑。公今第一流。志操古與期。兩州有遺愛。江西憺霜威。重來長道山。批敕兼瑣闥。一片憂國心。輾轉中夜思。正色抗危言。傳誦滿紳綬。造膝有啓沃。削藁知者誰。此心與天通。此意上所知。所以名愈尊。萬口同一詞。進用恐不速。小卻成歎咨。天語自昭然。更欲試望之。況彼三山重。謀帥皆衰衣。茲行豈細事。報政不待期。登門恨最晚。臭味忘賤微。自慙空惜別。不解留孔戮。十連終斂惠。居中乃其宜。試問行道人。但知望公歸。

玉版鮓次陸子亢郎中韻

鱗黃不減鯨與鱸。逆風鼓鬣噴腥涎。漁人不顧浪如山。談笑坐致扁舟前。一鉤香餌不得去。何用大網相索纏。揮刀紛紜鬪肉骨。巨口噉啣誠可憐。珍鮓萬甕不論錢。頭顱萬里賴行肩。星郎日參玉版禪。頗厭蔬食供盤筵。尙書親作孟宗寄。坐覺匕箸生春妍。卻笑多事張茂先。光怪異說空十年。

走筆送僧義沖

一氣行太虛。流行紛不齊。要之本無物。洞然無是疑。梵志有至言。還我未生時。燒了似不曾。亦有毛僧詞。沖師名家子。少年習裘箕。談吐霏木屑。落筆皆珠璣。自稱十年來。不復念作詩。空門坐枯禪。綺語知昨非。聞之意已消。談笑到日西。習氣終未盡。舊編還自攜。秀句堪供佛。古作力可追。愛玩不去手。未免成一癡。又欲上西湖。駐錫來語離。我生墮宿業。筆硯置藩籬。拔擢困胃腎。未老神已疲。幾欲焚故稿。要使心清夷。

君詩既不作。何不等棄之。萬事都放下。一意控玄機。語罷復自笑。無使高人知。作詩固無用。參禪亦胡爲。勸人反自蹈。此紙何必揮。不如兩俱忘。他時赤體歸。

催老融墨戲

古人惜墨如惜金。老融惜墨如惜命。濡毫洗盡始輕拂。意匠經營極深重。人非求似韻自足。物已忘形影。猶映地蒸宿霧日未高。雨帶寒煙山欲暝。中含太古不盡意。筆墨超然絕畦逕。畫家安得論三尺。身世生緣俱墮甌。人言可望不可親。夜半叩門寧復聽。三生宿契誰得知。一見未言心已應。巖傾千丈雪散空。上有清池開錦鏡。意行忽發虎溪笑。許作新圖寫幽勝。歸尋一紙五十尺。傅以礬膠如練淨。自知能事難促迫。捲送松牕待清興。筆端膚寸今何如。西抹東塗應略定。何當一日快先睹。洗我昏眸十年病。

獨旦草次九五從叔韻

朝菌晦朔雖不知。食之實冠東南味。庾郎二十有七品。一見流涎驚絕異。攝蔬剪韭皆可卻。味苦應無夏蟲避。大阮哦詩聲未了。又索蒸芝今再遺。邇來枯枿尙未茁。拳拳頗媿臺無餽。倘容小摘寄情親。會遣長鬚見芹意。

雪

丙午九月才入冬。晦日忽驚雪墮空。傳聞都城更復早。萬官入賀明光宮。自從開霽更不雨。和氣真似青春濃。斗柄插子日丁卯。夜燭裂缺鞭雷公。從以震霆至三四。驚破蟄戶紛昆蟲。寧知玄冥全未究。翻手作

雲千里同暗。臆初聽灑珠雹。巽二滕六方施工。一日喜見瓦溝積。忍寒待伴爛不融。二日三日遂盈尺。膏潤四海恩無窮。古來詩人詠不盡。巧思橫出昌黎公。少時奮筆不肯已。老矣袖手便疎慵。兒曹作戲記昨夢。舞狻猊踞金雙瞳。誰人苦欲撩詩思。更作玉山高數峯。移將劉叉兩冰柱。輝映愈覺清心胸。見之躍躍忽枝癢。起呵凍筆尋詩筒。開門一看天宇闊。素蜺百萬翻長空。瓊樓玉宇滿妙界。千林寶樹春玲瓏。恨無高臺三百尺。縱觀萬象凌空濛。固知幻景有變滅。一時如入崑閩中。僊家俄頃閱塵劫。安知此際非神功。賸喜年來米價賤。便欲扶犁隨老農。牆頭濁醪走來過。相與痛飲歌年豐。

少潛兄真率會

畫錦坊中作真率。羣從相過無俗物。主人就樹折楊梅。醉倒薰風涼拂拂。小舟傍城登雉堞。坐看白鳥蒼烟沒。須臾撐出洞天去。傑閣三層高突兀。樽前賦詩貴神速。十分鈍似遼天鶴。從他銀漏促殘更。要見林間紅日出。

送元聲弟赴水陽監鎮

吾翁積德厚。九子官其六。不幸失二人。孤嫠紛在目。三弟尙白丁。升沈猶未卜。吾人扶門戶。參立如鼎足。脫死憂患餘。偏親須水菽。阿連先著鞭。去去長江曲。弱冠承賞延。十載荷衣綠。間關困家食。才就五斗粟。要知官無卑。毫髮當長肅。督耕兩丈圩。受輸十萬斛。處之誠未易。勉旃直自勗。執別動萬感。酌酒再三祝。吾子素解事。涉世要未熟。意行須授理。言輕恐招辱。王事究一心。言玷復三復。細行累大德。陰財損陽祿。

豈惟贈爾言。余亦每自慙。公餘稍有暇。更取故書讀。行矣更自愛。家聲要人續。

伯中弟生朝賦茶蘼

春日足風雨。不知豔陽天。桃李俱成塵。懶上西湖船。春餘忽微和。茶蘼發清妍。池塘芳草夢。況復向阿連。中庭月方午。密林澹清煙。蒙蒙青羅帳。粲粲白玉鈿。幽歡久不講。羣從俱謹然。銀燭煩高燒。妃子浴溫泉。花以酒爲名。我以杯相傳。爛醉不復辭。此會期明年。

黃巖令鄭仁叔索委羽洞府詩

君不見。王君羽化脫秦厄。故山至今名落翻。又不見。烏程野鶴投髦毛。佞臣稱瑞民斯勞。何如奉林控鶴。凌青霄。蕩然委羽登山椒。青衣出入洞方杳。紫氣氤氳風尙飄。今君頗似丁令威。鶴馭久去雙鳧歸。山川良是人民非。一新琳宮還舊規。黃山父老歌循良。誦君詩句游雲房。更將山名比堅操。百歲猶能徹骨芳。

青林

郡齋偶休沐。驅車出西城。依依山水佳。瀟瀟松柏聲。雪餘春意動。新綠生坳泓。行行到青林。老眼增雙明。主人喜客來。倒屣欣逢迎。幽居迹甚遐。健筆詩方鳴。回首幾年別。千里搖心旌。相見又睽隔。此意猶未平。不如造齋閣。四座酒重傾。風流陶彭澤。骯髒阮步兵。看劍引三尺。論文驅六丁。綠野秀橫檻。山寺傍連甍。石罅幽泉溢。腳底輕雲生。詩盟忝予會。弈道從君爭。哦詩谷禽應。列炬林鴉驚。清歡未云足。累句忽已成。環坐粲十眉。舉酒酬三英。滿壁酒醉墨。歸夢含餘清。我方媿此集。君欲尋前盟。吏鞅才縛我。秋風爲君行。

隱清

右軍訪文君。遁迹入深竹。我來尋歎歎。人亡但空谷。靈龜闔澄潭。華宇對飛瀑。若人今何之。尙想舊茅屋。吾聞古君子。千載守孤獨。楚些不可招。懷哉愴喬木。

送劉晉父監獄

濟南劉夫子。生來逢百罹。乃翁負長才。宦游至京西。時當建炎間。寇盜紛不齊。轉徙入湘廣。一家屢阽危。五羊買海舟。萬里向黠琦。舟破投永嘉。有如鳥擇棲。哀哀老治中。藁葬山之陲。母家在衡陽。孤嫠往相依。久臥漳濱疾。羈窮命如絲。事母以孝聞。執喪禮無虧。廬墓屏葦茹。至行徹丹墀。有詔寵數蕃。得官祇奉祠。行年六十二。霜髯照龐眉。慨然念防墓。千里來海涯。西山如蓮華。古今家壘纍。況此久宿草。蕪穢不復治。孝思雖甚切。冥漠何從推。行道爲興歎。智力無所施。有僧幾九齡。自言記當時。君聞亟叩請。東岡指荒基。吾師慕泓公。少也從吾師。墓中有版識。倉猝不暇碑。素棺無石槨。灰炭周四圍。君方感斯言。鑽穴從旁窺。其言皆可驗。自此不置疑。惟餘蓋棺木。遺骨不堪移。斲石表故阡。遂塞無窮悲。此僧老而壯。斗酒如覆卮。與君登山椒。下上幾如飛。竣事才數日。溘然不可爲。孝感人益仰。真有神相之。君曰某不孝。遷奉致失期。未得如有失。旣得涕滴頤。嗟我誠寡陋。識君顧已遲。一朝來短札。謂我從此辭。皎皎真白駒。安得施繫維。戴侯舊山長。參語心相知。謂余當詩此。頽風激澆漓。世出世間法。君方控玄機。引證卽贖語。焉用骫骳詞。衡陽尙寄書。當有鴻雁歸。後會渺無日。爲賦古別離。

王成之給事囿山堂

煙雨望麗陽。前山羅紫翠。照水挹南明。不與巾子對。榻來登囿山。一覽萬山會。蓮城山固多。此地要爲最。主人意軒豁。物景供曠快。山椒湧華屋。迴立風埃外。一物無遁形。所在皆纖芥。清霜肅天壤。佳樹隔闌闔。俯仰隨取舍。左右從盼睇。門牆尋故步。杖屨許從邁。恍然至絕頂。更覺宇宙大。樽酒屢勸酬。基枰更勝敗。秋高月色皎。浮雲了無礙。不俟攀僊掌。徒手吸溪瀨。茲堂極崇敞。意若欠深邃。先植易生木。徐待松柏兌。望遠仍可喜。意滿聊自晦。無使山下人。或得窺外內。但恐趣賜環。樹藝或不逮。先生味斯言。一笑相領解。吾將飭園丁。隨處添翳蒼。他時遠扶疏。吾廬益可愛。

游初陽谷及白巖

重來游僊都。止欲訪獨峯。寧知一峯外。佳境無終窮。何處潁川子。鏡巖便相逢。約我游白巖。輕舟借溪翁。齋餘尋宿諾。秋霽波溶溶。清徹見石底。鑲刻驚神工。昨登初陽谷。但見石嵌空。茲浮懸崖下。萬石森巖崑。上有勝絕地。古語留郭公。鬼神謹呵護。雷霆掃塵蹤。換船到白巖。修篁搖清風。縈回進石屋。孤竹攢沙蜂。洞府僊所闕。無由辨西東。扣舷過巖下。數仞如崇墉。石趾平如墊。奇怪遮蒼穹。更尋小蓬萊。俯瞰馮夷宮。篙師進深窽。捫蘿捨枯筇。游子非不多。無人解從容。我因一日留。幽尋極山中。秋旻快排蕩。日暖如春融。歸坐獨峯下。石影橫空濛。急呼醅醖清。澆此磊砢胸。幸有濟勝具。未能上金龍。爲君揮五絃。決管送飛鴻。

夜游獨峯下

峯背正白月舒光。峯影橫野萬丈強。仰之彌高立卓爾。蔽遮星斗摩穹蒼。半秋風露清徹骨。望望直欲隨風翔。歸尋玉虛步松徑。月輪正湧門中央。

送顏希聖尙書守泉南

聖朝寶運開虞唐。太平天子垂衣裳。恢張治具崇儒良。孰不願依日月光。用之則行舍則藏。孔門賢德遙相望。朝望方隆位文昌。跬步可到中書堂。問公擁麾何太忙。公獨三請志益剛。兪音一下冥鴻翔。行李徑出臨濤江。爭留孔戣動朝行。公更偃俯不敢當。老成全德真圭璋。温如春風嚴如霜。柏臺我豸肅朝綱。賢關嚮風士氣揚。大天小天稱公方。五年吏姦蓋而彰。金華勸講言加詳。明主傾聽談皇王。盍膺枋除任贊襄。名遂身退天所臧。明哲保身身更康。高風可仰不可量。泉山壤土接臨漳。建牙千里開封疆。老龍負圖寵煌煌。何殊衣錦還故鄉。賤子薄宦接王楊。曾陪御史臨文場。風簾官燭夜未央。劇談猶記聲琅琅。茲來誤忝尙書郎。始尋故步依門牆。西風津頭望歸煌。輓公不留遠予將。兩宮念公未詎忘。公雖遠去如在旁。庶幾重來上錢塘。夾輔大業恢中邦。倘有重事須平章。

陳順之靈壁石硯山

陳順之吏部靈壁石硯山中有雙澗。低處爲硯。下米元章題云。唐弘文館校書李羣玉有詩。南唐李重光故物也。蔣教授文會有詩。次韻。

名畫法書環四壁。中有米家眞寶石。壁峯森聳外澗流。他物雖奇敢爭席。舊屬半山老僊人。佛印乞之如

乞鄰阿章有力負之走。一時攘取成紛綸。此石天然非琢磨。是時有水生巖阿。至今硯池尙餘潤。歲月既久惜不多。幾年徒見士夫說。一旦喜看形偃月。傍連玉立兩於菟。主人照映冰壺澈。陳侯之富可敵國。會有寶光驚四塞。呼童吸盡硯中水。更爲輕翻玩奇刻。不堪回首江南李。空唱多愁似春水。不如此石千載傳。玉砌雕欄等糠粃。寶晉得之真不舛。身後寧知亦輕棄。只今傳玩知幾人。當日瑣窗空自秘。端歛爭名南北部。勿向雷門揚布鼓。銅臺渴瓦更不須。祇合觚稜蔭風雨。

跋汪季路所藏修禊序

永和歲癸丑。羣賢會蘭亭。流觴各賦詩。風流見丹青。右軍草禊序。文采粲日星。選文乃見遺。至今恨昭明。字畫最得意。自言勝平生。七傳到永師。襲藏過金籊。辯才尤祕重。名已徹天庭。屢詔不肯獻。託言墮戎兵。妙選蕭御史。微服山陰行。譎詭殆萬狀。徑取歸神京。辯才恍如失。何異敕六丁。文皇好已甚。丁寧殉昭陵。當時馮趙輩。臨寫賜公卿。惟此定武本。謂出歐率更。採擇獨稱善。遂以鑄瑤瓊。流傳迨五季。皆在御寢扃。耶律殘石晉。睥睨不知名。意必希世寶。氍毹載輜輶。帝昶旣北去。棄與朽壤并。久乃遇知者。龜置太守廳。或云政宣間。此石歸紹彭。又言入內府。宣取恐違程。焚膏繼短晷。拓本手不停。疊紙至三四。肥瘠遂異形。南渡愈難見。得者輒相矜。我見十數本。對之心欲醒。汪侯端明子。嗜古自弱齡。錦囊荷傾倒。快觀喜失聲。帶流及右天。往往字不成。而此獨全好。護持如有靈。尤王號博雅。異論誰與評。硬黃極摹寫。唐人若無稱。贗本滿東南。瑣瑣不足呈。猶有葵與撫。砧砧近瓊珩。右軍再三作。已覺不稱情。心摹且手追。安能效筆精。

響揚固近似。形似神不清。不如參其意。到手隨縱橫。況我筆素拙。何由望羣英。近亦得舊物。庶幾窺典型。此本更高勝。著語安敢輕。孤風邈難繼。悵望冥鴻征。

送劉德修少卿潼川漕

清朝重諍臣。選取妙一世。矯矯劉御史。一鶚勝百鷲。顧瞻最有力。步武亦嚴毅。一生憂國心。千古敢言氣。氣足充所學。文能行其意。遇事輒奮發。觸邪無顧忌。乘驄行且止。斂手已知避。但思補袞闕。何暇爲身計。獨立當雷霆。三進氣彌厲。去魯固遲遲。出晝豈濡滯。上終行其言。羣賢爭挽致。將輸向潼川。寓直尙書祕。風裁仰清峻。進退審難易。伊昔聯周行。睽違十餘歲。來爲同舍郎。愈篤金蘭契。洗眼看騰上。寧知攬征袂。抗章歎高絕。勇退尤知愧。去勿窮日力。予環日月冀。承君送道鄉。硬語吁可畏。毋以此自滿。當爲不止是。臨別提斯語。少盡交朋誼。萬里苟同心。吳蜀安有異。

次韻李季章監簿泛湖

僊舟共泛滄波去。且向蘇公堤下住。西風吹就芙蓉城。青鏡閑妝兩呈露。皇家法常儉素。宸心但欲乘商輅。離官別殿無興作。天以西湖供一豫。吾儕公退得清賞。酒醖葑杼不知暮。深知夕照戀狎鷗。又恐明朝追振鷺。自憐三入鳳皇城。歲月黃塵等閒度。湖光正欲捲簾看。風色更煩褰幙護。孤山不見處。士庶司馬空尋蘇。小墓酒乾人醉歡有餘。聯騎還趨湧金路。歸來健倒渾不知。睡覺燈前裊香霧。文人公子真冰玉。曾爲出遊揮妙句。匆匆借韻僅成章。敢詫尊前鸚鵡賦。

送楊廷秀祕監赴江東漕

平生楊誠齋。可仰不可見。去年尺一書。老韓忽同傳。道山故僊伯。再上右文殿。蓬萊幾清淺。筆力愈雄健。獨挾風雅轡。孰敢當白戰。一官定一集。流傳殆千卷。拙工見大匠。有技不敢獻。誰持斫鬢篇。徑掣巖下電。誦之百寮上。慙汗幾被面。公今欲何之。江左去乘傳。鼻間長栩栩。仕已忘欣怨。英英日暮雲。薦紳極追戀。挽公不得留。觴豆紛祖餞。惟應三山高。須公和江練。君王念疇昔。臨遣尤繡纒。公乎遂來歸。密侍清閒燕。坐寢淮南謀。如彼雪見硯。從容處籌帷。侵疆歸古汴。

送曾無玷寺丞守池陽

我朝衣冠盛。名家數三曾。南豐暨潁川。後起參溫陵。邇來螺川族。駸駸著簪纓。春風雁塔中。參差見姓名。君才素穎出。健筆泛縱橫。江右兩壯縣。談笑政已成。河陽桃李花。武城弦歌聲。入朝八九載。去擁池陽旌。年家有舊好。一見意氣傾。更因劉御史。爲君寫先銘。去年叨省郎。君亦轉爲丞。中都但交謁。名紙空毛生。惟因候賓廡。接膝傾交情。分陰尤可惜。翻恐倒屣迎。阿連幸爲寮。庶幾多合并。寧知成勇退。拂袖尋歸程。秩滿素簡靜。不足煩公行。要當試盤錯。操刀新發硎。似聞有劇部。或已薦長卿。君其少停驂。有詔來皇局。

劉望之國錄惠示文卷。次韻爲謝。

吾聞三峽江。湍流下無底。吾聞岷峩山。聳秀且千里。坤維氣淑靈。所產多名士。高文旣鏗然。特立亦卓爾。久慕黃中劉。近有貢公喜。亟從蜀士問。人物定誰比。少年負奇節。論事如翻水。萬里見張胡。義激非氣使。

賢關遂爲寮八尺見英偉。諸君皆斂避。相與推德齒。惠我春容篇。句法參子美。再誦平生言。作者真近似。戰國信徒勞。秦貪不知止。漢唐取與守。反覆皆造理。藩鎮論加詳。河朔分鼎峙。詞源既淵深。浩博渺無涘。從今使諸生。教育均蒙被。論議歸正平。辭章掃浮靡。古人去已遠。時毋分彼此。君其挽之回。續絃須鳳髓。

餞李君亮著作守眉山分韻得翠字

天下大峨山。雄秀盤厚地。山雖不在眉。所在擁空翠。矯矯三蘇公。挹此淑靈氣。文章垂日星。照映蓋一世。李侯起廣漢。射策叩丹陛。褒然出羣英。東南謫名字。來上著作庭。行入甘泉侍。胡爲把一麾。西歸尋藥市。吾聞此州俗。乘法更陳義。厚德坐鎮之。近古翻易治。君家義槩堂。活人百萬計。老親懷故山。色養謹承志。還家萬里餘。赴鎮夕可至。不作題柱驕。豈有畫繡意。斑斑老萊衣。人間真樂事。忠孝無兩心。出處固一致。他日上思君。命駕當不俟。此別諒非久。毋庸摻征袂。

送張定叟尙書鎮襄陽

武部尙書張公出鎮襄陽。士夫莫不惜其去。昔韓昌黎送鄭尙書詩。韻必以來字。祝使成政而來歸。疾去而願歸。蓋人之至情也。而公自受隆委。謂邊事非可趣辦。願加久任。庶有成績。憂國而不爲身謀。聞者壯之。某嘗陪郎省。餞別分韻得壤字。未能措辭。繼又隨西蜀諸賢之後。始得詳聞臨遣奏請之言。被酒夜歸。亟述長韻。

公家忠獻公。勳名照穹壤。南軒傳聖學。後進斗山仰。尙書天分高。百聞真朗朗。日坐四益堂。濡染助涵養。

小出輒驚世。發譽自英蕩。兩朝倚才辨。三接承睿獎。堂堂尹京手。風采漢張敞。九街寢桴鼓。終朝清訟鉢。汙流化清溝。鬧市鋤巨駟。鈴齋晝無人。士友厚吾黨。政成化自行。談笑揮浩穰。皇家重閭寄。拊髀勞注想。頗牧起禁中。帝曰汝其往。人多惜公去。地位切台兩。惟公不擇地。引義猶慨慷。詎度更周詢。千里若尋丈。再拜受臨遣。因得進忠讜。邊臣固多事。備禦當素講。要須久其任。百弊隨剗破。願假臣歲月。表裏如指掌。人材固不乏。第一戒欺罔。樸拙勝巧心。好佞寧木彊。願求忠信士。枉直謹誅賞。更須寬轡策。奏請應如響。上問卿何先。安靜最爲上。上憂襄漢間。吳楚欠遮障。公因論形勢。袞袞到遼抗。是時晉在洛。武昌勢相向。是爲必爭地。南北謹隄防。今雖居上游。事與古殊狀。狂寇縱欲來。無處可傳餉。況今三埵靜。皇靈方遠暢。與蜀相犄角。國勢自增壯。尙期效尺寸。才疎意非廣。忠肝氣凜凜。秋旻足排蕩。上喜憂顧寬。趣行開玉帳。捐金示優寵。諭賜煩上相。惟公最得士。離別俱惘惘。薦紳紛祖餞。直欲傾家釀。賦詩寫胸臆。一一成技癢。家聲與國事。負荷有餘量。邊頭十萬兵。公臨如挾纊。吾聞胡運窮。羣酋欲爭長。不戢將自焚。前轍有狂煬。當爲不可勝。有和謹毋倡。千載羊叔子。制敵恢天網。行將友斯人。山川固無恙。備成撫機動。應煩護諸將。功高歸未晚。會見登弼亮。他時名父子。繼踵凌烟像。

送鄭惠叔尙書守建寧

十五年前送別詩。道山持節向江西。今年又見送公別。大夫擁麾鎮閩越。向來惜別固已深。今日珍袪尤動心。尙書自是第一人。氣義相許披胸襟。南宮五表平明入。列辟傳聞俱聳立。壽皇聖孝冠百王。三復高

文天爲泣。擢處螭坳。寵數新。果然百日掌絲綸。拭圭修聘稱應變。握節不撓威殊鄰。直上銀臺尤振職。李藩氣槩時批敕。嗣皇銳意新百度。筆端真有回天力。星辰聽履冠文昌。急流勇退驚朝行。望之正欲試馮翊。長儒寧肯薄淮陽。孤拙自憐銷壯志。三入修門空負媿。薦人不進終不已。獨賴當時言有味。公在猶歎一居州。公去無人爲王留。公乎行歸佐天子。肯作管晏卑微休。

送蘇壽甫少卿赴潼川漕

老坡送江直入海。君今歸尋江之源。外臺去鄉若不遠。爲持使節臨潼川。君家家世四海間。單于一問驚胡塵。歸來便合上清禁。胡爲日念橫峨岷。賢哉羣從傳家風。夕郎名節世所宗。諸卿亦復載清德。況君又似尙書公。壽皇念舊久更深。聖明親擢傳玉音。君歸寧能及黔突。定應召駟來追尋。清獻入蜀攜一龜。君今數鶴同載歸。他時未免蕙帳怨。人在西清鶴自飛。

分韻送孫從之司業使湖南得千字

夫君靜而敏。人十已則千。讀破萬卷書。操筆思湧泉。古事與今事。一一探本源。蚤蜚場屋聲。作吏志益堅。竭來上清班。漢庭誰在先。雍容行必書。史館躬繫鉛。片言寤明主。立使登諫垣。拳拳憂國心。傾倒十三篇。司成天下選。歸志已浩然。赤日送妻子。襆被尋谿船。諸生慕陽城。欲挽不得專。竟持湖南節。征袂何翩翩。憶昨忝同登。于今三十年。朝行喜相會。終恨非官聯。請益殊未厭。匆匆啓離筵。始以長官來。來以繡衣還。書生素安分。豈問卻與前。第惟公輩流。自應留日邊。德星聚南楚。予環當茹連。事體有關繫。臨岐欲無言。

送王恭甫倉部知洋州

天清無雲秋氣明。好風叢桂傳芳馨。乃于此時送君行。江空日短難爲情。蚤從兩川馳大名。眉宇瑩徹春壺冰。語輒傾倒地地平。大篇小篇韶鈞鳴。壽皇一見喜不勝。璧水道山照羣英。潼川題輿遠有聲。痛洗鹽筴疲民醒。天子呼來再登瀛。典領著作承明庭。絕域往陪蘇子卿。馬上談笑胡人驚。歸來期君侍西清。胡爲西去謀專城。士友重歎君不甯。視此進退秋毫輕。洋川風物天下稱。文翁流詠人載賡。當時猶待羣政成。君今未到意已傾。岿峩大輻秋江澄。圖史萬卷鷗與盟。殘編斷軸恐飄零。數輩裝潢手不停。我亦重來預影纓。三日不見鄙吝生。況此摻祛將長征。欲挽不留鴻冥冥。賜環勿憚萬里程。江山多助筆縱橫。黼藻王度扶中興。

題范寬秋山小景

山高最難圖。意足不待大。尺楮眇千里。長江浸橫翠。畫家雜雲烟。愴恍徒意會。苟或森三尺。便若俗子對。此畫格律嚴。興寄獨超邁。洗眼映牕明。妙處乃不昧。流泉見原委。著屋分向背。推車度危橋。指路向關隘。輕舟最渺茫。浦嶼如有待。山稜瘦露骨。汀洲橫若帶。木葉黃欲脫。秋容儼然在。霜餘無片雲。歷歷數沙界。搜尋因力疲。欲賦無可奈。近山才四寸。萬象紛納芥。欲識無窮意。聳翠更天外。

江西李君千能。能和墨及畫梅。良齋許以三奇。而詩非所長也。

游藝無小大。要皆知本原。後人率意作。終當媿前賢。老潘妙對膠。法從玉局傳。或假季心名。空掃千鐘煙。

補之貌梅花疎瘦仍清妍。折枝映月影。真態得之天。李君信雅尙。二者將求全。諸公競稱許。試之乃誠然。江西有詩派。皎皎俱成編。茲事未易窺。屬君尙加鞭。

分韻送盧國華福建提刑得華字

盧侯場屋聲。天馬騰渥注。殘膏沾後人。奇芬吐天葩。來踏九陌塵。去種河陽花。向來再去國。盛山建高牙。平生長者譽。靜篤語不譁。古井絕微波。璞玉無纖瑕。使星照蜀道。惠愛流三巴。吏姦賴刮磨。民瘼煩搔爬。田里誦盧公。兒童知國華。白首尙郎潛。坐曹事如麻。翩翩擁軺車。去去向合沙。朝行惜君去。舉酒相邀遮。共登獅子峯。巨石臨哈呀。卻來登湖邊。野梅訪萌芽。老柳掃黃葉。枯荷轟寒茄。碁枰戰文楸。醉帽欹烏紗。伊昔送君行。相去萬里賒。荷君遠寄書。得得來東嘉。一見又成別。感念成咨嗟。羨君徑褰帷。往戍不待瓜。先尋上水船。何殊泛僊槎。作粥喜奉姊。上冢仍過家。此計正未疎。所恨成天涯。尙幾或留行。船鼓毋庸槎。

題老融畫牛溪煙雨

暝煙吹雨冥冥。兩牛半渡深清。京塵久污巾履。頗思歸濯吾纓。

慧元畫寒林七賢

舊有唐人出游圖。謂宋之間。王維。李白。高適。史白。岑參六人。多畫七賢。不知第七人爲誰。或云是潘道遙。然未見所據。病起坐攻媿齋。元公忽作寒林七賢相寄。余方夢寐故山。見之灑然。戲作數語謝之。

羣賢俱詩豪。世代不同處。安得寒林中。聯鑪睇相語。誰歟創妙意。臭味無今古。吾聞顧陸輩。寓意或如許。桃李並芙蓉。雪中蕉葉吐。元師師老融。淡墨掃風雨。作此寄攻媿。歸興渺煙渚。舊六今則七。未知果誰與。我欲從之遊。詎敢廁儔侶。畫我往執鞭。欣爲李君御。

李文綬和所贈老融詩復次韻爲謝

鄴侯插架書最多。筆力雄奇天所命。萬人海中深閉門。理窟搜尋到幽覓。我詩無律如山謳。形穢豈堪珠玉映。時時歸夢入故山。曳杖松間記投暝。因君佳句撩秋思。便欲歸尋舊三徑。兼旬足瘳不良行。況復炎蒸如釜甑。夜來一雨洗河漢。簷溜涓涓清入聽。晨興剝啄誰叩門。乃有同聲喜相應。讀之恍若濯清風。自覺昏眸怯明鏡。伊余何幸點班行。結交往往多名勝。夫君平處願清新。解道澄江如練淨。從今我乃得四友。不特官梅動詩興。推枕裁詩謝高致。扶僮搖毫心靡定。舊聞讀檄愈頭風。今賴長篇起衰病。

次韻六和塔秀江亭壁間留題

江外參差列萬山。我家深在萬山間。好山正不用錢買。但要未老身先閒。長江比愁終似少。江水能回愁不了。扁舟何日過西陵。鄮山佳處吾歸老。

跋袁起巖所藏修禊序

悵望當時真蹟。臨摹所在支分。千載但稱合作。誰能有感斯文。定本爲世界第一。此又在定武前。今日錦標玉軸。向來不直一錢。

送陳君舉舍人東歸

皇天生人物。千載非偶然。冲和兼萬人。始得一美賢。夫君乃其人。人一已百千。飛黃欲追風。况復勤著鞭。文陣蚤奔放。氣欲摩青天。短褐東海濱。名貫斗牛躔。聞道更獨蚤。自言若墜淵。出登龍虎榜。徑上鷓鴣聯。中間幾流落。清湘窮沂沿。白首始爲郎。一見意已傳。登瀛上麟臺。授簡游兔園。擢爲柱下史。遂居紫微垣。去天真尺五。朝綱賴扶顛。龍樓闕問寢。萬口爭進言。惟君最勇決。螭頭屢直前。危言破人膽。三進加勤拳。天高聽亦高。歸袂何翩翩。高風激頽波。同列空慚顏。君雖未必去。一去勝九遷。我欲留孔戮。有懷不得專。况我自欲去。何心挽歸船。嗟我生何爲。與君幸齊年。先後才九日。相與同氣然。幾年若契闊。班心忽差肩。判花同代庖。君思如湧泉。上房草數制。下房時一篇。一篇輒高妙。隗始媿余先。春秋隱公傳。國史建隆編。周官授大旨。所得俱未全。聚散不可料。餞別滄江邊。君將處於陵。我耕綿上田。君行無疾驅。中途恐傳宣。不然遂成別。孤帆渺風烟。夢魂不可制。隨君墮中川。

次韻趙子野石城釣月圖

石城江頭可憐月。曾照六朝清夜獵。古往今來知幾何。長江袞袞蕭蕭葉。謫僊去後詩盟寒。王孫詩瘦清。樂樂詩情浩蕩坐無柰。扁舟笑把磻溪竿。江平風輕波瑟瑟。宿靄卷空天一色。東風吹句入長安。一卷風流坐中得。初得神意清。再讀胷次平。回顧明月祗如故。世上興廢徒紛更。想君一葉方掀舞。夜靜水寒誰與語。船頭有酒且孤斟。莫向金陵重懷古。

戍溪道中

寒潮高于埭。黃流濯西河。人牛俱力壯。相與衝流過。潮落勢回禦。轉權依丘阿。暮靄起平楚。陰雲翳寒莎。夜分潮復上。櫓聲相軋摩。大江渺無津。不知身在何。餘生一虛舟。兀然聽風波。吾親白雲下。沉爾方臥疴。遠遊非吾事。歸矣毋蹉跎。

哭表弟汪去僞墓

內弟幼而敏。抗志欲決科。一行試曹掾。吏才猶患多。謂當爲時用。舌在如命何。通籍已艱阻。入幕終蹉跎。我生依外家。侵尋閱義娥。視君如同氣。竹馬聲相和。少長聯硯席。詞場深琢磨。相期到晚歲。杖履俱婆娑。寧知五年別。君隨東逝波。憶同戍溪行。我馬君乘羸。馬驚費十駕。羸俊已倍過。重來意慘愴。樹擁山嵯峨。嗟君父與兄。相望空山阿。宿草埋白壁。寒風撼林柯。沈吟痛疇昔。有淚如懸河。

次韻蔣德要三徑

居山或稱囚。得閒乃賦謫。我方樂靜退。來作三徑客。西山致朝爽。膏肓在泉石。況當秋空淨。萬里看一碧。

吳參議達觀齋

君不見大鵬與鸞鳩。自適俱是逍遙遊。又不見大椿視朝菌。一修一短終期盡。況乎秋毫爲大泰山小。莫壽殤子彭爲夭。漆園老子超衆作。立論雖奇定非矯。鳧脛從短鶴脛長。蠻觸亦能成戰場。譽堯非桀兩置之。讀書博籒俱亡羊。世人顛倒名利途。躋攀分寸爭錙銖。河伯猶驚北海若。井蛙醜雞何足誅。試同萬衆

走城市。躍馬途行分賤貴。卻登高處望塵中。但見紛紛如聚蟻。暫高猶爾況真高。神游八表非矜豪。寧能
高舉去人世。勿以役役隨滔滔。是知達人有大觀。蝶夢爲周聊自玩。翛然無入不自得。處若終身仕成漫。
吳侯晚到東海濱。飽諳世故無戚欣。相逢一笑成莫逆。似知我亦個中人。

送姜子謙丞於潛

處則有超蓮。出則將哦松。眉宇無一塵。出處皆雍容。君看妙蓮花。本出汙泥中。兩松痛掃溉。下有簿書叢。
汙潔無二致。喧寂本亦同。於潛今畿邑。蜀道萬里通。至今存古意。民風尙醱釀。一邑旣當問。尤宜撫疲癯。
藍田文最高。後學仰韓公。彼言蓋有激。昧者但稱工。成案漫不省。丞哉豈真豐。姜氏太嶽後。夷門慕家風。
教子延名師。列碑多儒宗。宮庠旣開荒。書種慶所鍾。換桂雙枝秀。益見筆硯功。後生日加勉。衣鉢傳無窮。
君才有餘刃。壯行氣方充。功名此椎輪。勁翮看摩空。我歸幸同社。棊酒時相從。尊前不忍別。吟愁夕陽春。
我家老揚州。五記有遺蹤。向來耕織圖。爲煩訪溪翁。

送從弟叔韶尉東陽

阿連少也爽。孤立生氣餒。壯年淬詞鋒。傾心事鉛槧。膠庠困蠶鹽。世科終穩占。再興蘭桂堂。爾祖真不忝。
況將尉東白。士友尙欽豔。惟我愛子深。老矣猶不厭。固知爲子喜。頗亦動吾念。贈子當以言。苦口當針砭。
此邑子舊游。歷歷數行店。棠陰見郎君。遣老喜窺覘。其民最服義。情僞靡容掩。莫恃彩棒威。要使幕巾墊。
子文多立就。詞采更華贍。吾聞得雋者。塞門差反坫。前賢最加謹。臨用更重檢。他時可待取。天庭得錦幟。

吾家有素風。耳目久滯染。毋庸慕豪舉。助廉先以儉。酒酒更宜戒。平地有深塹。酣暢當有時。勿習盃激澗。將論毋過高。斯言卻防玷。立節毋務奇。躡等恐成僭。外物思過分。檢身但多欠。勿嫌一尉卑。封清尙爲儼。仕途固嶮巖。大要進以漸。不須苦求知。真知奏應剡。向來湖海豪。四十可收斂。寧爲處囊錐。莫作露刃劍。匆匆摻祛別。魚鮮酒方醖。刮目待子歸。罔俾吾言驗。

攻媿集卷三

古體詩

送制帥林和叔歸

使君一何清。鶴骨天與瘦。少年場屋聲。六藝飽芳漱。一行起作吏。所立已不苟。立朝凜大節。論事幾及雷。發言必體國。平正無矯揉。藜藿爲不採。風采照宇宙。出入有本末。眼見凡三就。來不爲苟合。薦召乃結綬。去亦不好高。三宿徐出晝。天官豈不貴。陳義堅素守。贛川嘗報政。復來守鄴鄆。不求赫赫名。實出龔黃右。情僞千萬端。到眼輒空透。撫民過嬰兒。閭里息爭鬪。姦胥及強吏。時用霹靂手。人誦南山判。情通理亦究。六邑俱帖靜。稱贊不容口。律身至嚴冷。無能掣吾肘。吏事精且勤。呼燭侵夜漏。公退入家塾。諸孫後來秀。吏卒不識面。雜誦出牕牖。幾年南塘路。來往困僮仆。一朝平似掌。行歌紛老幼。公心信如水。古井波不皺。榮觀處超然。軒冕亦何有。翩翩欲賦歸。排雲屢騰奏。廟論終不許。斯民方借寇。上心重閔勞。祠官向廬阜。閭境極攀戀。人人懷杜母。君看臥轍人。誰能使奔走。挽須不得留。百拜願公壽。老我幸同朝。傾蓋已如舊。聯事東西省。交情久益厚。我歸公亦來。門戶託雲覆。黃堂間參語。惟我甥與舅。揚旌鳴鼓吹。賁此蓬華陋。清談不及私。翁歸況不受。義命孰不知。踐履或差謬。惟公見善明。力行真耐久。有時相與言。心同蘭茝臭。

摻袪寧忍別。追送列觴豆。公雖不好飲。勉爲引醇酎。公去我亦隱。菽水翻綵袖。花溪渺何許。望望幾雙堠。千里共月明。懷人重搔首。惟應折梅花。臨風爲三嗅。

賦揚州伯父海檜

潛虬拔地徑天矯。騰拏勢出青雲表。爲誰猶向此中蟠。坐閱春秋昏復曉。團團圓蓋月輪平。蟲蠹蒼叢衆星小。枯槎當面結生香。外有霜皮細勻遶。乃知造化有神巧。散作樛枝窮樹杪。雖非直幹棟梁材。怪怪奇奇樂幽窈。獨秀海山臨浩漾。駭浪翻空雲縹渺。茁芽自有甘露滋。弄影幾經霜月皎。崢嶸老氣本天然。後生矯揉何時了。我家揚州真好事。買歸但覺千金少。夜半有力欲負之。護持和璧終歸趙。從來寫照無髣髴。畫師欲快毫端掃。解衣盤礴意慘澹。卷起生綃色徒悄。我來青邊立寒峭。自憐氣與秋天杳。倚筇一笑賓亦歡。開尊相與傾清醪。謂當好此如好賢。爲君三復緇衣篇。時時來前看不足。終待結屋平湖邊。

跋碁北海扈從書事詩

晉陽固自有高共。奉天豈可無宣公。當時扶日滄海東。尙想健筆驅長風。指揮諸將如奴童。中興內相當推功。斷碑毋庸詫詩工。制稟具在鑾坡中。

送萬耕道帥瓊管

黎山千仞摩蒼穹。顛顛獨在大海中。自從漢武置兩郡。黎人始與南州通。歷歷更革不勝計。唐設五筦如容甯。皇朝聲教久漸被。事體全有中華風。生黎中居不可近。熟黎百洞蟠疆封。或從徐聞向南望。一粟不

見波吞空。靈神至禱如響答。征帆飽掛輕飛鴻。曉行不計幾多里。彼岸往往夕陽春。琉球大食更天表。船
交海上俱朝宗。勢須至此少休息。乘風徑集番禺東。不然舶政不可爲。兩地雖遠休戚同。古今事變無定
論。難信捐之與揚雄。四州隅分各置守。瓊臺帥閫尤尊崇。高牙大纛擁方伯。鼓吹振響驚蛟龍。漢家威名
兩伏波。盧丁以來幾宗工。衛公精爽尙如生。妙語況有玉局翁。使君吏事素高了。明若古鏡摩青銅。叱馭
行行不作難。平生惟仗信與忠。布宣王靈萬里外。益使向化來蠻蠻。頑獷未率宜以漸。勿示駭政先含容。
平平之策用定遠。下下之攷書陽公。吏臣生長固安土。尙當摩撫如童蒙。屬僚宦游豈得已。士多失職悲
途窮。名分尊卑不可紊。更念何處不相逢。官事既了兩無間。可使和氣俱沖融。鄉閭惜別情所鍾。臨歧爲
傾琥珀濃。手遮西日念遠去。欲留奈何鼓逢逢。願君穩度三合溜。早歸入侍明光宮。

寄題高汝一少卿識山堂

廬山之高誰不識。欲識其真了難得。往來山中最親切。嶺爲橫看峯是側。曾從彭蠡望山外。識得山南昧
山北。山體如一本不動。人苦求之愈多惑。君構一堂據滄城。香爐五老皆嘉賓。莫問前後與向背。面目還
君多識真。君今與山如故人。慎毋忽作白頭新。堂中燕坐靜且壽。君其于此知吾心。

侍仲舅同諸表游山

來游大梅山。陟山知幾重。平行十仞岡。俯瞰他山峯。一步一步高。勢欲凌虛空。左顧九地底。樓臺鳴鼓鐘。
蓬萊反在下。直恐船引風。又疑海水竭。洞見馮夷宮。行行愈就順。故步尋苔封。十年舊主人。相對如夢中。

清談虛閣上。坐到夕陽春。年來頗畏影。掣身慕冥鴻。入山非不深。猶有行人蹤。安得更深處。尙友荷衣翁。未問梅子熟。寧能噉青松。庶幾適吾心。餘生得從容。

大梅山

此山名大梅。驅車入山麓。試問山中人。山名竟誰屬。禪家開道場。爲說梅子熟。僊家指爲巖。曾此隱梅福。或云古有梅。其大蔽山谷。至今二梅梁。靈響皆其族。他山抗驚湍。禹祠橫殿屋。三者尙誰憑。禪師有遺族。餘皆不可辨。安得究圖錄。但愛山又山。喬林間修竹。

金峨漱石亭

溪聲真是廣長舌。歷劫談空聲不絕。不知來自何處山。一意傾東忘萬折。我欲漱石向水濱。無奈齒牙搖落頻。夜半寒聲到客枕。只疑身是枕流人。

寄題台州倅廳雲壑圖

頃年登臨赤城裏。江遠城中萬家市。治中寄我雲壑圖。快讀新詩眼如洗。回思歲月如星流。念念飛空尋舊游。披圖哦詩想幽致。直欲攜筇上山頭。聞有於菟在岑蔚。晚徑寒鷗敢翔集。幾年榛棘蔽颺颺。一朝絕境從中出。細路雖非五達康。縈迴自覺阻且長。萬壑風煙開絕頂。一丘曲折于中藏。老砂射日銀星炯。梅峽含風襟袖冷。千巖高下各異狀。如障如鋒亦如領。天景須憑意匠營。山不在高僊則名。規撫已定力。未暇。他時會有滕王亭。風濤隔闊天垂幕。安得扣門親剝啄。吟詩夢到故山川。睡美不知鐘鼓傳。

王原慶新遷居南堂。以古風求寫恕齋二大字并石刻。次韻。

三槐諸孫有奇士。才高特未遇時爾。作詩猶能備衆體。短章大篇仍雜擬。解紛便掉三寸舌。隨陸蘇張何足比。鷓鴣猶未離風塵。蛟螭尙爾蟠泥滓。平生曳裾向侯門。豪傑聞風親瞻企。只今交游亦凋落。凜凜一身嗟獨峙。槐陰滿庭渺何在。久寓瀛壖成故里。瀕湖小樓太孤露。何殊玉川洛城裏。邇來深入作郊居。高屋好山成二美。未能拔劍斬樓蘭。幾欲袖椎摧晉鄙。便將拂袖武陵溪。誰能著腳長安市。西門性急佩柔韋。柳子氣高戕曲几。衡宇全似歸柴桑。茅茨大勝居儋耳。我詩非工字尤拙。荷子愛忘剛見喜。夜來縱筆寫恕齋。自笑黔驢技止此。更求古刻訪少作。頗記醉中曾諾唯。舊書紛沓費搜尋。魚鱗未開塵事起。呼童卷送三數軸。僅可障風同故紙。新詩鼎來亟予和。顛字敢追張長史。不須更投苦海中。一笑以還隨棄毀。徑須攜酒登南堂。朗詠白駒三四章。

又次韻

投老歸稱前進士。時與田夫相汝爾。淵明賦歸何敢望。曼容自免差可擬。門前爵羅真可設。老圃灌畦聊自比。恕齋空洞最相親。笑談頗覺清無滓。時時過我共銜盃。望望不來予爲企。丈夫未遇困泥塗。誰識鸞停兼鵠峙。方期從容結詩社。相與浮沈向閭里。一朝別我欲遠游。欲入桃源深洞裏。爲言半隱欲偕行。二子風流真儷美。向來早有四方志。行盡東南到邊鄙。只今名利遂兩忘。爭心無復于朝市。祇有哦詩興未闌。連得新詩照塵几。調高韻險不易和。白雪陽春驚俚耳。年登六十鬢未斑。乘興一行若可喜。宗盟莫逆

素相忘。並轡笑談無彼此。湖海豪氣儘收斂。以怨名齋幾一唯。匆匆摻袪不得留。卮酒未乾人欲起。寄聲半隱不容言。空有語離書滿紙。歸時廣和必盈箱。寫盡山川詩作史。送子才歸深閉門。莫問是非并譽毀。但期遠歸亦升堂。西湖仍訪老知章。

送鄭楚客司法之岳陽

先生作賦真人吟。高處獨步無古今。少從三山來四明。一羣士子多青衿。我嘗學仕六七載。膏馥沾勺資之深。竊名文場掌帝制。至今不敢忘指南。英英二子俱秀爽。遣以一經無贏金。長公奉母上巴陵。念君遠去因論心。見君詩編筆雖敏。三嘆未見朱弦音。〔案〕此下似尙有數句。爲傳寫者脫去。

史清翁次前韻覓酒以金川玉友一枕瓶西安酒一斗送之次韻

社中日相從。此意豈不真。其初定要約。深期往來頻。今年苦多故。孤負四郊春。清和到新秋。其間足良辰。而我獨抱疴。未能會嘉賓。道人得玉友。風味尤可人。思與君痛飲。欲招復逡巡。忽焉得新酒。亟遣徑入脣。別有酒一斗。併使君意申。我雖不敢嘗。爲洗胷中塵。

陳天成用東坡趙清獻高齋詩韻賦適齋次韻

二公晚辭軒冕勞。兩齋莫辨適與高。嘗登雲山仰清獻。平地著屋山周遭。白頭日過適齋下。釣游尙想隨兒曹。方從家舅與俱隱。野鶴誰能鳴九臯。如我數年未納祿。解去簪紱甘同袍。世間此事要識破。差處不可容一毫。穎川尉僊賦長句。數寸之管煩君操。欲追險韻繼坡老。詞鋒犀銳眞吹毛。舅家見詩勉續貂。長

松相倚慙青蒿。我今無復望祿仕。不應招我更由敖。

送元衛弟赴長亭鹽場

阿連生而秀。二親所甚愛。仲兄勤撫養。遇事輒加誨。幹盡靜而辦。胥次無卑隘。今焉職半盆。官宇臨渤海。毋謂官爲小。要使所居大。毋言才可了。檢身到纖芥。我家門戶重。衣冠綿數代。當以誠心求。子視勿自懈。亭民亦良民。孰謂俱無賴。官吏旣擾之。兼并責逋債。熬波亦良苦。樂歲色猶菜。輸鹽不得錢。何以禁私賣。所在積蠹久。良法寢多壞。吾聞不無術。更當審利害。熟視不爲謀。空餐媿難蓋。不應行一切。遽使絕稱貸。富者能寡取。倍息久仍在。貧者庶少寬。公私可緩帶。母年登九十。家居幸康泰。其家不從政。禮經有深戒。幸子去不遠。時時可歸拜。小別不足惜。輕舟送前邁。

送從子沆宰鄖鄉

小阮幼鍾愛。長乃遭百罹。風木旣深痛。棣華更纏悲。所賴有吾子。獨立守家規。上有門戶託。傍有孤與嫠。忽爲躡國行。沂江秋爲期。冬滂與夏漲。潢水足險巖。摻袂送子去。風帆不可羈。城中楮爲幣。邑下尤可知。定知公事少。不必事作爲。用智正惡鑿。大道本自夷。家無壯子弟。宗族各天涯。幸有知己人。方且把一麾。四海皆兄弟。官寮善待之。眠食謹調攝。家務須自持。俸薄用宜嗇。無使實漏卮。此別動深念。毋忘故鄉思。一書抵萬金。時寄賓鴻歸。

送高仲遠赴潞倅

高氏在四明。于今爲清門。貳卿道素高。夫人德尤尊。子弟盡恂恂。夫君更春溫。昔年奉慈親。定省嚴晨昏。今日當門戶。友愛深弟昆。伉儷信緣合。端良由性根。門中有孤嫠。極意均撫存。與我親兒女。次第了嫁婚。不可解于心。肯自以爲恩。不言而躬行。後生熟見聞。諸郎已秀發。穎異有佳孫。鄉評共歸重。內外無間言。公勤官業廣。所至治不煩。僊舟何遽西。行行佐侯藩。環滁皆好山。風月當平分。醉翁與樂全。遺蹟今尙存。況有賢使君。易鎮方北轅。公餘陪嘯詠。相映如瑤琨。生來仕平進。自此朱兩轡。從兄今鼎貴。鼇禁兼掖垣。君其繼英躅。復收舊青氈。老我得投閒。頻年接清歡。同社摻君袂。戀戀傾離樽。梅風吹溽暑。祝君尙加餐。

秋雨兀坐。王原慶攜孫吉甫菊花倡和見過。有分遺之意。次韻。

五載杜門居海角。無復翻堦賦紅藥。自憐荒徑菊猶存。夕餐空待秋英落。眼明喜見綠叢叢。始也抽芽今滿握。扶筇著意養孤芳。荆棘旁連細開斫。天香入骨徐吐芬。中有秋風非外鑠。傳聞南堂有佳種。願過屠門思大嚼。頗亦有意欲見之。此意未容兒輩覺。乃知便許移芳根。不止園官供小摘。要令壽客來駢肩。何用潭水求延年。有時採之東籬邊。不覺南山在眼前。淵明千載幸同調。老我此際方悠然。西風吹花日夜急。散金坐看開田田。兩詩先到衡門下。思向平臺尋戲馬。從君九日去行樂。莫爲登高淚盈把。

送王粹中教授入蜀

王粹中教授赴新蜀帥尙書黃公之招。萬里有行。古調一篇贈別。因誦所聞以求益。雜然陳敘。不暇較工拙也。

萬山四塞圍平陸。大爲關中次爲蜀。我生東南未曾到。蜀士游從聞頗熟。自從襄陽上峻途。高欲登天下
臨谷。女媧大山塞空虛。麻綾名堆千萬曲。行人一升鹿頭關。下瞰平川如畫幅。幅員二百四十里。里出萬
緡民日蹙。向來陝西五路兵。退守諸關疆地促。計臣權宜重增賦。民力尙寬隨所欲。爾來因仍七十年。鬼
不輸錢無雨粟。民生哀哉不堪命。外若富饒中不足。益梓尙有繁盛風。夔峽窮民幾比屋。側耕危穫供稅
租。飯多稊稗無嘉穀。朝廷謀帥弄印久。宣諭尙書剖符竹。尙書當今第一流。翁壻相望冰映玉。貽書挽君
爲此行。古人義槩非流俗。君亦慨然挈家去。摻袂未免再三祝。君行豈爲溫飽計。一舉高飛快鴻鵠。丈夫
生有四方志。登覽山川非碌碌。頃爲假吏到燕山。未行先取山經讀。所至訪尋多得力。中原至今在吾目。
北征西征昔有賦。何肯從行空逐逐。子西嘗因過峴山。遐想羊公欲相沃。關右放賈眼拔鋏。表留卒使癯
潰肉。試推此意向前去。到處前人有遺躅。五丁開山果何在。贊皇籌邊言可覆。劍門石角皆北向。雪嶺界
天望身毒。高皇將臺在漢中。武侯八陣留魚復。棧閣繩橋世稱險。威茂渡笮來夷族。李冰離隼如底柱。大
寧鹽泉若飛瀑。四路尤多未見書。買歸何止三萬軸。黃松次功蜀檇杙。石湖居士吳船錄。君宜豫攷經行
地。卻隨所見書之牘。幕中便可資籌策。遠業因茲增蘊蓄。又聞渡瀘不在瀘。南在沈黎。邛峽九折是君家。
世尤當知。藝祖按圖揮玉斧。大渡河外等棄之。本朝獨無南詔患。一語決定無敢違。成都郡庠千白袍。後
來之秀日益奇。周公禮殿歸然在。畫像盤古繼宓犧。春秋奠謁用舊樂。想見節奏并威儀。談經酌史各專
門。學問可以相發揮。康節遺書有傳者。不惜師問窮精微。先天僅得十二三。聲音律呂無由窺。更有異聞

多細事。試因餘暇質所疑。青城大面訪僊跡。普賢多變窮峨眉。街名碁盤路九達。江號濯錦如汗池。古柏參天二千尺。水滸鼎立三石犀。藥有珂貝說尤詭。字書不見栴與椳。金堂鸚鵡掃孤塔。蒼溪橘柚五出桺。嘉陵梵像爲最巨。閬州城南天下稀。少陵入蜀往來久。須行萬里方知詩。我慙寡聞言又拙。君其更爲加詢咨。老我無復爲世用。但當杜門待君歸。歸期未知果何時。時寄尺楮寬吾思。

山行歸來喜栽新竹

平生好看竹。每見覺相與。小大或疎密。一一皆媚嫵。恨無地可種。所至造竹所。近方關門徑。得地尋丈許。乞鄰栽百箇。參差正當戶。天公有老眼。惠以三日雨。山行不厭泥。但喜竹無苦。歸來報平安。翠葉多楚楚。不妨來子猷。奚必希蔣詡。何當遠扶疏。歲寒與君侶。

小溪道中

晚出城西門。循牆過南境。夏橋日沈輝。旅店月成影。納納川路遙。聒聒水聲冷。敲枕擁衾稠。樂此寒夜永。醉題魚屏

五千買得見屏風。白魚相逐菰蒲中。俊尾潑刺有生意。旁人未易分雌雄。屏後諸孫更雍容。濊濊無數迷西東。我雖非魚知魚樂。樂處未必魚知儂。

范牛

人問吾何愛一牛。范僊真筆倍風流。繩牽雖未如自放。猶勝更著金籠頭。

白醉

陶內翰清異錄首載。開元時高太素隱商山。起六逍遙館。各製一銘。其三曰。冬月初出。銘曰。折膠墮指。夢想炙背。金鑼騰空。映簷白醉。余愛其言。取以名閣。陳進道惠示大篇。次韻。

處世難獨醒。時作映簷醉。年少足裘馬。安知老夫味。天梳與日帽。且免供酒事。謫居幸三適。得此更慚愧。向來六逍遙。特書見清異。君家老希夷。相求諒同氣。曲身成直身。朝寒俄失記。醉中知其天。不飲乃同意。書生暫奇溫。難與純綿麗。

贈范緯文秀才

括蒼范牛自題云。中興道士范子珉。異人也。淳熙間武昌羅端良使君遠寄詩篇。有贈畫牛范秀才一詩。愛玩不能去手。時時誦之。以寫云亡之悲。今十八年矣。有范緯文叩門。初談風鑿。旋及墨戲事。自言視子珉爲大父行。羅使君贈詩卽其人也。旣試其說。草數語畀之。

中興道士以牛鳴。淡墨百果尤著聲。妙人神品仍有靈。我不識之欽其名。曾得烏犍兩橫軸。又有石榴才一幅。武昌使君舊寄詩。未言秀才乃其族。忽有緯文來款門。自言真是當家孫。口誦羅詩若翻水。他詩歷歷俱能言。一見前畫歎真蹟。願得生綃奮吾筆。爲作來禽對石榴。一掃橫枝生意出。我詩不工人已陳。有詩豈復能動人。爲君一寫使君語。更求知己如羅君。

送陳表道宰南豐

與君出西郊。送子之南盱。子爲名父子。才器真璠璵。乃翁老從臣。循吏追兩都。益公工擬人。謂比王仲舒。積善必餘慶。于公大門閭。子能傳家學。何止讀父書。執喪真有聞。孺慕久不渝。彈琴不成聲。西上何徐徐。文場嘗得雋。一跌重歎吁。通籍金閨中。夷庚因少迂。邑中有三曾。聲名照堪輿。士夫秀而文。比屋多爲儒。萬里此發軔。胸中有全模。將別更求言。老馬從問途。乃翁同汪出。親誼崇終初。以規不以頌。不自知其愚。民社非細事。況此壯大區。不飲第一策。精神長有餘。以此奉塵刹。以此當萬殊。何官不可爲。禍福皆在吾。劇邑最爲難。謹畏可無虞。試看悔吝者。實惟予之辜。民力久已困。未免索稅租。欲如古什一。攻瑟難吹竽。古意行今法。自應知樂輸。有弊勿亟鋤。責己重以周。檢束到錙銖。兩腳踏實地。處事隨精粗。頑不在斯民。猶不在吏胥。苟以明恕行。久之定交孚。爲善無近名。實著名與俱。飲啄信前定。富貴不容圖。三年報政成。明時其舍諸。老我世無用。情親肯自疎。盡此一盃酒。惘然摻子祛。相依忽成別。加餐意何如。

陳天成詩多和東坡韻。茲因寄喜雨詩。走筆謝之。

一春垂垂困多雨。雖曰如膏反成苦。自知潦後必成旱。果見晴天雨黃土。連旬不雨已嘆嗟。滌滌山川雲不吐。未聞鶉鳩鳴屋角。但有蚊蠅爭振羽。一梅無望望重梅。早魃爲妖無術禦。閒居憂國後雲霓。夜夜三星正當戶。君王側身歎涼德。雲漢之詩無媿古。避殿減膳率以躬。已債縱囚真有補。使君精禱盡誠意。千里歸心稱杜母。四郊神物招螭蜒。所在疲氓加手撫。風伯在今誠可訟。已聞石燕空中舞。時時小雨慰人心。渴瓦流膏僅兒乳。傳言望日當通濟。老巫已得靈神語。霈然三日果應期。靡神不舉誰爲主。河流頓已

復舊痕。良苗喜見與南畝。中宵愁念不成夢。摩挲便腹眠清午。從今一飽便可望。坻京行見曾孫庾。陳侯忽就春容篤。徑遣長須入城府。歎君健筆今已老。不草敕書招贊普。坡翁相去已百年。時出新詩追步武。

六月十六夜觀月翼早紀所見成長謠

海雲湧立雙鐵山。明月正在山中間。初疑漢陂藍田出水面。又似長風吹度玉門關。須臾雲過月愈上。太虛點綴從飛翻。白衣蒼狗不足究。千變萬態俱可觀。忽焉橫臥如蒼龍。驪珠領下光團圓。山河清影見歷歷。桂枝扶疎若可攀。夜深醉到雞鳴起。光景不類居塵寰。長庚睥然朝曦發。望舒猶掛西林端。我欲呼吸晶華駐朱顏。左有金丹右玉丹。昔聞兩曜在天如磨蟻。日行日止一度慳。太陰行速朔必會。金餅旋復成弓彎。八卦萬物盡關繫。歷古不已真跳丸。急景恂恍難控搏。但見霞彩生爛斑。老我已復卦氣闌。學道無成空自歎。不如安坐委天順。一聽運化更循環。

它山堰

它山吾鄉絕境也。屢游而不及賦。近過其上。得前四句而歸。季夏鬱蒸。午寂無事。因足成篇。寫罷長哦。遐想勝地。寢覺風生兩腋。汗垢俱清。比之陵陽冷語。尤爲消暑上策也。

它山堰頭足奇觀。百萬雷霆聲不斷。誰把并州快剪刀。平剪波瀾成兩段。四明山深水源遠。衆壑會谿長漫汗。滔天狂潦不少留。瀉入長江勢奔竄。賢哉唐家王長官。欲圖永利輸長算。想得慘澹經營時。下上山川應飽看。西偏千嶺相屬聯。惟有茲山擁東岸。遂于此地築橫埭。截取衆流心自斷。斟酌利害不全取。高

下參差僅強半。水大十分七入江。徐挹三分供漑灌。支流瀾瀾穿郡城。脈絡貫通平且緩。旱時反此水亦足。坐使千年忘旱暵。無窮廟祀報元功。像設森嚴人敢玩。梅梁天矯有冥助。大患于今尙能捍。前輩所作多神靈。日月真成赤心貫。後人小智或更易。費盡工夫隨破散。河堙盍浚謀不集。堤斷河傾流甚悍。富民縮手人受殃。仰望古人重興歎。老木號風波湛碧。畫屏俯仰丹青煥。更須積雨看驚湍。濡足褰裳何足憚。去家不遠時一遊。短艇垂綸流可亂。八月倘有僊槎來。便欲乘之泝天漢。

林復之求爲僧。陳君舉爲寫山谷與俞清老詩而和之。次韻。

歸墨氣何銳。爲儒意何闌。勸沮皆不可。要惟心所安。何必收澄觀。強欲加巾冠。余看飲光衣。以次傳阿難。

送秦仲防制幹

秦郎相家子。被服一寒士。不味膏粱珍。嗜書如嗜芟。仕途樂平進。欲上行或止。制使護瀛壖。婉畫幕中試。不避癡兒譏。但欲了官事。君賢他可及。好善無與比。公餘仍進學。訪問無巨細。片言苟有聞。必欲窮根柢。一介有可觀。窮閭必躬履。老我甘投閒。衡門人所棄。惟君異時好。時來訪生死。淡交久而敬。清談或移晷。一朝語余別。摻袪不容已。向來二三公。頗亦同臭味。去去羣欲空。今君又行矣。欲歸投金瀨。尙眷甬東水。結交多老蒼。要路有知己。青氈我家舊。勉旃取上第。先聽傳除書。使我喜不寐。別後未相忘。毋愛書一紙。

送蔣德常宰鄱陽

某社頗寥落。聚會多差參。矧如夫君賢。貴重雙南金。豈可無此君。周旋相與深。一別歸未久。征鞞又駸駸。

老我苦多病。別酒難重斟。摻袪不可留。贈言効規箴。吾聞古番君。甚得江湖心。官無崇與卑。時無古與今。古人乃能爾。斂衽當致欽。我亦一丈夫。毋謂力難任。未暇言偃歌。肯彈必賤琴。明恕加撫摩。細故多親臨。網密吏易姦。賦重民弗禁。飛鴉懷桑椹。烹魚漑釜鬻。此邦熟往來。當有慰黎黔。君能踐世科。朝行佇明簪。公餘昌遠業。書讀松竹林。故家未見書。校讎如向歆。時時爲尋訪。歸來共書淫。勿以三徑荒。間作莊鳥吟。勉哉赴功名。莫待二毛侵。數年倘加我。寒盟尙能尋。

題家藏二畫

一龍

老龍臥海沙。覺來未欠伸。珠光發海底。闐然目有神。畫龍不畫全。必雜烟與雲。此龍未嘗動。具見爪與鱗。一龍望見之。爭心生怒噴。奮迅勇欲前。便爾雲滿身。不知出誰筆。定非塵中人。若非親見之。何由寫其真。雲濤方洶湧。恍若渺無津。爲霖會有時。正爾良苦辛。乃知青雲高。不如寂寞濱。深虞或飛去。什襲聊自珍。

一虎

一虎弭耳行。一虎立而顧。猛鷲乃天資。亦爾相媚嫵。媚嫵尙眈眈。況復逢其怒。吾聞宣城包。今古稱獨步。投老筆愈精。利牙爪可怖。方其欲畫時。閉戶張絹素。磨墨備丹彩。飲酒至斗許。解衣恣盤礴。手足平地踞。顧盼或騰擊。窺之真是虎。捉筆一揮成。神全威不露。此其真是歟。爲我振蓬戶。藜藿將不採。何止讐狐兔。

送陳進道倅三山

陳侯少有場屋聲。歲在壬午聯薦名。晚年倦游安里居。君亦懷綬歸家庭。齊年連姻更同社。臭味相與如弟兄。一朝話別欲遠去。洗盞更酌歌渭城。金沙樂土宜宦遊。或謂不減洛與京。平分風月信可樂。人家弦誦幾連藝。豈惟帥閫賴關決。定知秋闈望陶成。西都外司掌宗盟。須君共二爲之丞。勿謂爲丞但虛稱。亨途要當自此升。惟君儒雅聞簪纓。種學歲久筆縱橫。奧篇隱帙了如響。清談吐屑四座傾。詩筒來往附郵傳。時出妙語人爲驚。梅花萬樹照山白。荔子百種輝空明。九門雄尊盛官府。三山森聳多地靈。長樂一志書不盡。平生頗恨未經行。煩君傑句爲摹寫。遠寄使我心神清。

送姜子謙宰鍾離

濠梁自古揚州城。禹娶塗山城尙留。鍾離雖嘗作楚縣。子男之國書春秋。卑梁爭桑起吳釁。陰陵失道除漢讎。嬴秦屬之九江郡。典午置郡任愈優。蕭梁尤重北徐鎮。高齊又爲西楚州。貞觀割淮疆理失。元和加水號名修。陽冰篆虎書戶冊。奇畫于今照譙樓。浮山築堰誰與謀。漫引童謠爲激溝。役工沈鐵不勝計。欲灌壽陽爲廢丘。霧昏三日水怪出。一決空貽千古羞。上格下格果何在。西濠東濠猶並流。守邊在人不在險。險阻如故事不侔。元魏擁兵數十萬。義兵堅守竄其酋。向來橫澗一失據。凜凜重貽宵旰憂。刺史舊帶兩城使。渦口兩城今在不。君侯妙年筆爲投。名位詎肯卑微休。世科高挹更臙仕。哦松壯志未足酬。欲効金城上方略。宦遊直到窮邊頭。三光五嶽氣猶分。故疆慨想何時收。邑事不足煩大手。往訪古今資遠猷。老我無用重多病。爲君相與數觥籌。葦社冷落故人少。況復臨風送行舟。看君徑赴功名會。努力自取公

與侯又聞魚臺在近境。誰知魚樂如莊周。烽沈柝靜若多暇。從容何惜觀游條。

送瀟丞剡川

工部丞峴丘。我生丁巳年。比吾旣逾冠。再轉丞金困。年齡過半百。奏子哦松軒。親見勤小物。如彼少壯然。受輸導行費。略不取一錢。飛糠至眯目。猶恐勞弗宣。汝方壯有室。行行貳剡川。地近旣便親。俸外有圭田。惟當念爾祖。奉職罔不虔。邑無不當問。事亦不得專。退無爲避事。進勿至侵權。莊生才不才。其間要求旃。去年苦早歉。穀熟殊頗偏。未知催科時。何取何當獨。一十七鄉民。戶口富人烟。去天曾不遠。嫩惡易以傳。大寧九十餘。父母俱華顛。況子勤幹蠱。豈不深愛憐。食祿須盡瘁。母歎我獨賢。不應頻往來。特有檄可沿。時時寄安書。何殊在目前。秋賦已復近。公餘更加鞭。金壘喜接境。一水通鄉船。他時倘少病。尙能催擊鮮。

送王知復宰建德

筮仕一何早。字民一何遲。歷歷三十年。中間多險巇。宦途祇平進。分寸窮攀躋。最後官胄監。一蹴黃金闈。祇由能自愛。風鶴甘退飛。寧爲紅蓮幕。往尋武陵谿。親黨多勸止。君去獨不疑。治家有賢媛。應門委佳兒。安居捨大廈。列屋閒歌姬。風霜登客路。單車如雞棲。勇決有如此。端是英雄姿。有志事竟成。不後一年期。明詔趣鷄班。壯縣催瓜時。贏得爲君子。否泰相因依。古郡足瀟灑。年來困征追。守宰俱賢明。斯民其庶幾。杭葦欲走別。有足如繫維。舉酒向西望。離愁渺天涯。惟君才素高。邑若不足爲。謂難易將至。謂易後難支。老我百念冷。安能效良規。猶記簿領初。過庭聞舊詩。惟畏爲過寡。惟勤無功虧。遺訓儼如在。終身當誦之。

題趙尊道渥注圖

趙尊道制幹以龍眠渥注圖示余。余曰：誤矣。本韓幹馬。東坡曾爲賦詩者。此龍眠所臨。而以後爲前。俾易之爲書坡詩于後。而次其韻。馬實十六。坡集詩云十四匹。豈誤耶。

良馬六十有四蹄。騰驤進止紛不齊。權奇倜儻多不羈。亦有顧影成驕嘶。或行或涉更相顧。交頸相靡若相語。畫出老杜沙苑行。將軍弟子早有聲。中間名種雞羣鶴。無復瘦瘡烏暮啄。當時玉花可媒龍。後日去盡烏呼風。開元四十萬匹馬。俯仰興亡空見畫。龍眠妙手欲希韓。莫遣鐵面關西看。

題高麗行看子

高麗賈人有以韓幹馬十二匹質于鄉人者。題曰行看子。接處黃綾上書韓幹馬。表飾以綾。尾以精紙。皆麗物也。聞其懷金來取。因命工臨寫而歸之。再用東坡韻書臨本之後。

竹批雙耳風入蹄。霜鬣剪作三花齊。相隨西去皆良種。撼首勢竄迎風嘶。丹青不減陸與顧。麗人傳來譯通語。裝爲橫軸看且行。云是韓幹非虛聲。圉人乘馬如乘鶴。人馬相語同呼啄。中有二匹眞游龍。爬梳迴立綠楊風。賈胡攜金贖此馬。亟呼工人臨舊畫。我詩無分到三韓。寫向新圖時自看。

跋李少裴修禊序

唐文皇之賜韓王。有崔潤甫之題爲可攷。若李重光撥鐙書。斷然無能效之者。其爲眞筆何疑。朱徐開皇之記。則已見少裴之辨。開元去貞觀未遠。潤甫又職校定四部圖書。以爲最善本。則眞善

矣。辯才之本。旣殉昭陵。今世止以定武本爲第一。又出歐陽率更所臨石本。自應在墨跡之下。則知此本信爲冠絕。蓋希代之寶也。然攷之新舊唐史。崔湜弟液。湜及從兄淮。竝有文翰。居清要。液至殿中侍御史。液弟滌。明皇用爲祕書監。出入禁中。後賜名澄。如此。則液爲湜之親弟。而爲祕書監者滌也。又宰相世系表。博陵安平崔氏。仁師相太宗。高宗次子擢。擢之子液。吏部員外郎。第四子挹。挹之子湜。相中宗。湜之弟滌。祕書監。如此。則液爲湜之從弟。又不爲祕書監。傳之與表。已自不同。而滌之親筆。乃爾。于是知作史與攷古之難也。因併述之。仍賦長句。以副少裴好古之意。

蘭亭修禊。永和中和。羣賢高會。俱雍容。右軍作序。亦寓爾。稟草乃致。傳無窮。自言疑若有神助。他日屢書終不同。歷代傳寶在祕府。尤其甚者。唐太宗。當時搜取極心力。摹本一一頒羣公。惟此真跡最奇絕。蕭梁開皇有遺蹤。親御奎文賜元嘉。龍蟠鳳翥何其工。辯才所取祕昭陵。此本一洗凡馬空。崔家兄弟列清要。誨子況復稱龜龍。圖書四部資校讎。當時尙有貞觀風。自云此爲最善本。冰銜臣液題甚恭。李王深得撥鏡法。筆力絕勁雄江東。右軍以來皆妙筆。名勝異代如相從。病餘扶憊行掃松。李君攜來爲發蒙。平生多看舊墨本。一見使我開心胷。摩挲歎息不自已。至寶盍入明光宮。隱居懷寶正不惡。異氣或能牛斗衝。叩門有客勿傾倒。恐有御史來乘驄。

送鄭楚客司法之岳陽

〔案〕原本脫去此首。據集目在本卷第十二首。今從他本錄補于此。

先生作賦眞入吟。高處獨步無古今。少從三山來四明。一郡士子多青衿。我嘗學事六七載。膏馥沾丐資。

之深。竊名文場掌帝制。至今不敢忘指南。英英二子俱秀爽。遺以一經無贏金。長公奉母上巴陵。念君遠去因論心。見君詩編筆雖敏。三嘆未見朱弦音。海濱熬波幸解組。未知宦路多嶇嶽。先生賦編更熟讀。非止駢儷誇詞林。其中關鍵妙一世。字字諧協如鳴琴。談經況有著述在。持論肯爲向與歆。青箱但能世其業。前躡雋軌將駸駸。君家曾無錐可卓。遲次幸此突不黔。不惟母老身非少。廉介又務循官箴。量入爲出可不謹。斤斤飢食寒有衾。非求多藏第約己。瓶儲紙裹迹可尋。法曹持平守三尺。平反一笑神所臨。謹毋失己毋失人。同列當和時盍簪。上官善事免曠職。首上尻高宜致欽。岳陽樓號天下稀。地坼吳楚連衡郴。洞庭漫汗天立壁。君山當中出青岑。向來命名字以楚。宦游直到重湖潯。登樓談笑領僚屬。風流欣遇賢侯任。君行應得江山助。新篇寄我毋浮沈。摻祛欲言不盡意。更取濁酒從君斟。太守任涿道原。

攻媿集卷四

古體詩

趙資政建三層樓中層藏書

危樓傑立潭府雄。仰望驚瞿何穹窿。擊以八柱真良工。恍如木天移海東。扶欄三級橫復縱。八牕交映光玲瓏。更上一層迴不同。歷覽萬象俱空濛。東南太白金峨峯。西山千疊青芙蓉。環遶不斷如屏風。平疇彌望禾芄芄。城郭市井聚螳蜂。烟樹高低知幾叢。澄湖一片磨青銅。潮來江漲銀在鎔。海市三垂屬提封。四山寬圍城在中。地平樓小望易窮。安得高臥陳元龍。麗譙公府難從容。二閣均在道佛宮。江山得助無遺蹤。眼前突兀忽此逢。主人幹國成棟隆。鼎彝久書柱石功。名遂身退茲明農。卜築深靜依高墉。百間朗朗羅心胷。咄嗟不待馨鼓琴。最後奇觀凌虛空。牕戶未須濕青紅。似聞廬陵周益公。亦作此樓高于崧。相望落落見兩翁。心匠不謀如影從。我欲效顰意方濃。一朝登眺若發矇。不願侍公飲十鍾。不願舞女紛歌僮。插架三萬牙籤重。此身願爲書蠹蟲。不然相陪夕陽春。與公憑欄送冥鴻。

再題行看子

先引護欄毬子驄。九馬近遠俱相從。黑駒駟黃雕素駟。亦有笏面仍銀駿。夏國一種青于藍。五明錯靴皆

如龍。或驂或引。恣馳驟。坐覺隱耳聲。瓏瓏人間安得有此輩。一一必自天閨中。不惟骨相異凡馬。圉人貴介多雍容。三花翦鬣自官樣。空鞍更以香羅幪。中間二者蓋天馬。齒雖已老氣尚雄。不知幾出橫門道。雙立柳下青陰濃。擡韁掉領刷背脊。旋梳駿尾搖清風。人人生意馬欲動。態度曲盡各不同。韓生去我幾百年。藻色尚濕青與紅。不知何時墮雞林。萬里遠在東海東。賈人攜來得寓目。一見絕歎丹青工。千金可買真不惜。忽復攜去何匆匆。亟令臨寫得形似。如此神駿那得逢。開元內外馬盈億。色別爲羣從登封。韓生所貌定傑出。七尺爲駉八尺駉。向來鶯邊繫金絨。歸乘款段頭已童。伏櫪寧能志千里。卻笑區區據鞍嬰鑠翁。

寄題吳漢英玩芳亭

吳侯奕奕天分高。歷記萬卷無差毫。青雲垂上忽歸去。年來益收湖海豪。志同三閭時則異。玩此芳物亭之阜。視彼顛頓亦何苦。鼻間栩栩忘鬱陶。詩文滿軸寄海嶠。靈均細論無乃勞。與君齊年況同袍。祗今衡門沒蓬蒿。有芳可玩便自適。草間野卉時一遭。薤芷辛夷蘭杜若。未暇一一追離騷。詩文皆以屈平異同爲言。

送孫子祥赴新昌主簿

高士不爲簿。子嚴論獨殊。不遭何不可。而況主簿乎。夫君豈其裔。南明筮仕初。要知官無卑。祿可代耕鋤。正須勾小稽。使民能樂輸。矧復兼尉曹。鼠竊隨除驅。兩職去民近。亨途此權輿。君誠吾里秀。質厚素有餘。埋蛇有陰德。映雪讀古書。起家決儒科。鄉評足名譽。妻以兄之子。相與久相娛。小別不足惜。未免摻子祛。

邑境連台。刻好山環四隅。二子丞鄰。封川陸通。舟車乘輿。或一往徑。欲造庭除。公餘想績文。尤當惜居諸。會看興公賦。擲地金聲如。

送漳丞上虞

我老不復仕。行將掛衣冠。兩子俱貳令。官職恰一般。刻川且書攷。上虞亦之官。人言易捧檄。歸奉重親歡。我意正不爾。期汝政可觀。食焉怠其事。古訓戒捨饒。汝職與民親。簿書當細看。一邑無不問。正爾良獨難。江海市三垂。長堤捍驚湍。埭高幾如山。潮至不留殘。宣和有遺迹。能使潮浸灘。陂湖謹蓄洩。可以救旱乾。長溝濟漕運。浚治令通寬。此皆丞所職。勿憚心力殫。江頭有東山。永懷謝家安。邑有李與豐。況復居二潘。尙友更從游。問學加研鑽。平時固知汝。廉謹無欺謾。涉世終未深。送汝能忘言。故鄉去帝鄉。舟馭多往還。失已固不可。待人亦多端。罔求違道譽。善遣非意干。窮達自有時。此理真如丹。聚散不足較。豈得長團樂。閒靜我所便。汝其自加餐。有時或乘輿。往來二子間。踏雨送汝行。浮家當游般。走筆如家書。誰能苦雕剜。

送伯中弟尉新喻

伯父盛德人。伯中實暮子。不惟能象賢。氣貌亦相似。幼日讀父書。結字得骨髓。粹然金玉姿。少日期千里。寧知游上庠。蹉跎困名第。晚始著青衫。酸寒就一尉。欻然報瓜時。往戍真樂事。自惟羣從希。惜別不能已。中年重離別。況我衰如此。親故例作惡。況復于吾弟。茲行豈得休。雅懷聊漫仕。勿憚三年留。江南富山水。尉曹官雖卑。去民最密邇。一日斯必葺。職務毋少弛。善保金石軀。離觴且同醉。歸來畢婚嫁。相從期暮齒。

教子以義方。忍貧授經史。素業俱有傳。見進未見止。大兒方決科。如摘領髭耳。子尚徐其驅。中途聽捷喜。

送張子宓分教澧陽

澧陽渺何許。遠在天盡頭。頃爲郡樓記。圖志不可求。王侯錄故實。頗亦費冥搜。忠以申明著。學有車公優。外挹蘭江水。下俯僂明洲。讀書記羣玉。採藥思浮丘。況得子厚語。謂冠漢南州。見謂頗詳盡。豐碑照城陬。可憐城與樓。百姓不知修。乃知尙有遺。家傳載鄴侯。張君將客授。蓋嘗敘其由。爲我謝澧人。聊以遮前羞。君家世爲儒。青箱襲箕裘。太玄泊潛虛。探臨深可鉤。君才兼數器。博洽誰與儔。南廟推第一。鷓鴣快九秋。得官愈嗜學。手抄不能休。館殿要人物。衆寶登琳瑯。演綸及視草。如石眞勝流。蘭芷生顏色。暫煩爲遠遊。君方俟瓜時。相依意綢繆。樽酒接從容。詩篇更唱酬。論文究今昔。析理到孔周。老我澹無伴。摻祛不容留。別乘澹庵子。傾蓋當相投。公餘文字飲。能思故人不。

送周君可宰會稽

作邑誠匪易。况子之稽山。銀茜視兩赤。朝家知其難。鼎鼎數萬戶。賦重民生艱。山陵五雲飛。辦護力更殫。豫買萬世弊。法貪至于殘。越人瘠已甚。當饋幾發歎。名臣爲竭力。減額宜少寬。不齊物之情。茲事終變翻。箕斂及雞豚。詭戶多容姦。竟未得要領。條令何其煩。通才善治劇。南康遂通班。誠心試求之。要使後可觀。古仕不出鄉。習俗皆素嫻。東嘉嘗客授。尋乃乘朱轡。略如仕故鄉。非意不得干。況昔攝邑久。疾苦知民間。故吏想猶在。疲民知長官。宜若差易耳。未免送以言。權雖與正同。事體終兩般。趣辦不計久。爲眞事多端。

遇事勿生風。三思庶能安。試登寬簡堂。取我前碑看。六一真格言。坐右當銘盤。向來難奉母。版輿今似潘。外盡撫字勞。退公悅慈顏。蓮峯聲望重。待子與門闌。勉哉發政譽。行矣聞天關。

錢清王千里得王大令保母甄刻爲賦長句。

書家千載稱蘭亭。蘭亭真跡藏昭陵。只今定本誇第一。貞觀臨寫鐫瑤瓊。黃閔岡下得寶墨。古人燒甄堅于石。大令親書保母銘。況是當時晉人刻。甄雖破裂文多全。妙畫遠過蘭亭鐫。其間曲水悲夫字。駸駸欲度驂騑前。我家阿連縛虎手。更得退堂方外友。王君系出三槐家。參坐會文真耐久。田丁初來獻小硯。尋見津津若微溜。細看背刻晉獻之。永和彷彿在旁右。亟訪田家叩所從。始知墓崩隨意取。大甄支牀得前段。掀倒浮屠全尾首。字爲十行行十二。百十有七二字漏。交螭方壺不復見。貞石摧藏松亦朽。我得此碑喜不寐。摩挲三歎歎未有。興寧甲子十四周。更閱三年仍乙丑。若非洞曉未來數。安知八百餘年後。坡翁應未見此志。金蟬之銘何絕類。又知文章有暗合。智謀所見略相似。二王遺蹤無所遺。誰知地下此段奇。三君共爲成勝事。至寶呈露端有時。越山盤屈獻與義。付與耳孫世守之。煩君更爲護幽竅。或恐意如猶有知。

趙資政招賞川海棠。次袁和叔韻。

少陵千古詩人傑。每見名花輒題絕。錦棠無如蜀川盛。見說千林天染纈。大篇短草合無數。忍對此花舌如結。黃鶴銜子萬里來。春光頗向東南洩。棹閒老子攜春歸。移石鬱林表高潔。崇桃炫晝不足言。紅豔燒

林疑益烈。棠梨小紅自退聽。不待騷人定優劣。兩登蜀道歸海濱。一琴一龜全晚節。嘉招容我到花下。春酒新籟公自挈。攀翻亂插人共醉。十二金釵不成列。袁安參坐爲長哦。同氣相求磁石鐵。不須高燭映紅妝。佳月自能明作哲。紅潮滿頰臥林間。風流誰敢來分別。

泉口淨明院晝寢

沙頭古招提。往來幾經行。茲來當春晝。解衣偈西楹。玉立青琅玕。小牕虛且明。紙帳白如雪。牀輭枕更平。偃仰四體適。欠伸困思生。須臾右脅臥。徑入華胥城。無人夢自覺。閭然四無聲。林間婆餅焦。悠悠時一鳴。翻身更從容。意泰氣亦清。連朝走丘壘。百拜不遑寧。老我久倦游。幸茲息營營。衰相益已迫。世念日愈輕。自欣天與閒。身是半髮僧。未能遂高隱。庶幾保餘齡。

賦蔣甥若水番馬圖

何處驅來良馬六。騶黃參錯如花簇。胡爲不作騰驥去。各有游韉繫前足。胡人下馬俱少休。背倚氍毹眠正熟。酋豪揀箭奚奴撚。意欲射臺不遺鏃。琵琶橫倚續續彈。一夫坐聽胡中曲。臥擁提壺將引飲。英氣虬鬚皆貴族。沙磧坡陀高復低。天寒不見寸草綠。我行燕冀頗見之。狼帽烏靴乃其俗。勿云恃勇不知義。要以赤心置其腹。嗚呼。安得壯士健馬咸作使。坐令戎虜爲臣僕。

陳表道惠米纜

平生所嗜惟湯餅。下箸輒空眞雋永。年來風痹忌觸口。厭聞來力勅正整。江西誰將米作纜。捲送銀絲光

可鑑僊禾爲餅亞來牟。細翦暴乾供健啖。如來螺髻一毛拔。卷然如薑都人髮。新弦未上尙盤盤。獨繭長
縑猶軋軋。盱江珍品推高豐。荷君歸來攜來東。知君正直如羔羊。貽我素絲踰五總。僊禾本出從嘉穀。色
味俱同無餅毒。鼎深熟煮葱豉香。大美元來加麩肉。有時飯素苴以蓋。饒口屬饜味更奇。束皙一賦不及
此。爲君卻作補亡詩。

盧甥申之自吳門寄顏樂閒畫牋

年來吳門箋。色澤勝西蜀。春膏最宜書。葉葉瑩栗玉。賢甥更好奇。惠我小畫幅。開緘粲殷紅。展玩光溢目。
巧隨研光花。傅色濕丹綠。桃杏春共嫵。蘭桂秋始肅。趙昌工折枝。露華清可掬。妙手真似之。藏去不忍觸。
苟非歐虞輩。誰敢當簡牘。又聞樂閒君。古篆頗絕俗。併求數紙書。寄我慰幽獨。

題申之寄示春郊畫軸

郊原煦煦春意足。細草淒迷芳樹綠。雁鶩無數泛陂塘。羊牛相與隨芻牧。幾年不泛浙西船。恍如蘇臺俯
平川。閒人憂國無他策。但願好雨成豐年。

六言問天池寶華

昔年曾賦虎丘。猶恨靈巖未游。天池之景絕勝。寶華有水倒流。老矣不復西去。夢入陶朱扁舟。煩君爲我
尋訪。能以新詩寄不。

贈成都魯講書

焯字叔獻

君家江發源。我生瀛之壖。相望萬里外。中間幾山川。近聞今子敬。文價驚鸞鷁。何由夢見之。失喜瞻在前。幅巾簪英標。銜袖出文編。倒屣平生歡。劇談河漢懸。老我三入朝。廣識兩蜀賢。相與論諸公。與君最周旋。自言隱青城。讀書三十年。城中竹谿居。肥遯遠市廛。清谿擁屋後。綠樹環前軒。一舟號橫雪。可泝復可沿。拂衣下三峽。非爲名利牽。灑灑追古作。海潮賦新篇。舊依棹閒公。來乘甬東船。顧我何所取。有懷俱盡言。老親苦多病。膏藥冀少痊。佳客不容留。欲著歸驂鞭。間爲惡草具。願君少流連。報無錦繡段。贈有朱絲絃。一別無復會。摻祛意茫然。蜀山渺何許。同聲惟杜鵑。

趙資政當山堂

我公仁存心。樂山心如丹。平生經行處。不厭行路難。青城及大面。萬疊連百蠻。捫參仰脅息。亦嘗坐長歎。功成歸四明。得地數畝慳。城隅路窮際。小橋水汪灣。蕭條漁家市。中有屋百間。危樓俯人世。一看山四環。堂深無他景。猶以城當山。城荒披綠莎。青青透棹間。秀潤長滿門。坐對無躋攀。日夕氣亦佳。鳥飛相與還。終日看不厭。徙倚十二欄。有如擁泰華。管窺見一斑。況茲綠陰成。連朝雨潺潺。濃翠真欲滴。秀色幾可餐。我家但環堵。窮年困彎跽。出門得曠遠。遙碧羅烟鬢。有時碧雲湧。半空聳高顏。須臾輒變滅。欲駐良亦艱。羨公得佳趣。容我游其藩。悠然時見之。重門勿令關。

風琴

淵明有琴本無絃。白傅偏喜聽人彈。不如空中風度曲。隨風往來聲斷續。非宮非商從君聽。不中律呂無

虧成。大如角韻來孤城。細似蚓竅蒼蠅聲。華亭夜鶴圓吭清。顫動長引寒蟬鳴。或疑鳳唳叫霄漢。又恐僊佩雲中行。使其似曲無別調。安得自在聲泠泠。蛙喧尙謂勝鼓吹。牛鳴猶以黃鍾稱。絲不如竹亦漫語。賴此七竅俱瓏玲。幽人院靜新涼生。八風不問來縱橫。短簾六尺午睡足。拂拂神來傳廣陵。

送袁恭安赴江州節推

袁氏四世凡五公。唐朝三相傳家風。君家九代擅儒業。高曾藝苑俱稱雄。大父謙尊古君子。諸父名高表吾里。一門子弟更競爽。挹取乙科自君始。九江需次今幾年。去去淶水依紅蓮。忘年論交正相與。叱馭欲往難流連。老我秋來抱病久。臨歧無由置尊酒。祇從臥內敘離懷。戀戀摻袪仍握手。鵬程萬里茲權輿。平時義方師有餘。送人以言古所重。雖誦所聞寧起予。君看公孝與孟博。太守坐嘯仍畫諾。一郡之政賴關決。千里應須念民瘼。鄉州義事煩主盟。纖悉于余無隱情。處事條理亦爲政。知君出仕當有聲。尊公亦入閩中幕。公退著書端不惡。君才更得江山助。簡書旣省尋家學。君行遠業未可量。弟兄丹桂終齊芳。老詩無庸況多病。尙能留眼看翱翔。

趙南仲寄王樸畫貓犬戲爲之賦

鬢鬢兩狻猊。胡爲到庭戶。細觀畫手妙。摹寫真態度。意足謝繁筆。不待丹青汗。亂掃腹背毛。頭足巧分布。虯也如愁胡。眉攢眼光注。豈惟足生鬣。垂耳紛敗絮。掉尾固自若。狸奴爲驚懼。側耳實畏之。衝目猶敢怒。誠知取形似。不吠亦不捕。對之輒一笑。聊用慰沈痼。

朱季公寄詩有懷真率之集次韻。

伊昔羊尹臨丹陽。真率之名初濫觴。香山尙齒嘗會昌。臥雲不羨坐巖廊。七人各列官與卿。年德俱高世所藏。丙午同甲遙相望。清談生風想琅琅。耆英人物尤軒昂。賦詩遠追白侍郎。文富歸休壽而康。衣冠十
二何鏘鏘。吾鄉五老如雁行。至今月旦尙推揚。家舅仕宦接王楊。眉壽遂及渭水姜。我如傷禽趁鸞凰。忽
驚騎箕歸銀潢。向來雅約猶寶藏。菜羹草具烹麋肪。四皓中間有夏黃。藹藹義風誇句章。年來抱疴久在
牀。同社闊別如河梁。君嘗遠宦踰沅湘。又向封川憩甘棠。瘴雨蠻烟暗枕榔。何時歸安朝士坊。忽傳新詩
几生光。斂衽正色而寒芒。詩境幾成破天荒。徐爲續貂未須忙。靜揣歸期應未央。歸縱未衰亦老蒼。暮年
甘與子同裳。何事相望天一方。

吳少由惠詩百篇久未及謝又以委貺勉次來韻。

江左一世稱名公。首出劉惔與王濛。自高直以天自況。何止數仞言高墉。虛聲一傳實何在。但知景附而
風從。我朝諸公門戶闊。普納萬象如虛空。羣才俱入大鑪鞴。鑄人端如金在鎔。又如東君一布令。白者自
白紅自紅。巖巖千載玉局老。少年徑以吾道東。首干樂全次六一。二公自是燕許宗。奏篇六論初流傳。四
海一日俱承風。其間傑出六君子。香薰班馬猶爲濃。涪翁又分江西派。作圖序次由本中。哦詩作文各務
實。薦鷄不愧北海融。坐令文物掩前代。主盟豈非諸老功。固知文氣僵湜籍。亦許詩律沾徐洪。宛丘諸黃
接前輩。宜有此甥風味同。蚤嘗決勝翰墨場。筆端豪健誰爭工。新篇句句多灑落。妙畫字字真玲瓏。惜哉

生晚百餘載。歐蘇之門久登龍。尙茲蹉跎未闕步。吞舟之魚溝豈容。我方投老與世隔。映牕愛景方瞳矐。十年屏居可羅雀。何人來顧一秃翁。儼然衣冠見吾子。文書銜袖名自通。向來兩卷餘百篇。諷詠至今未能窮。更攜大篇如拱壁。刻劃無鹽賁孤蹤。人言霜蹄騁夷路。我今秋隼凌三峯。愛余過厚擬前良。此事如何著得儂。老我不入杞梓林。嶧陽高隱如孤桐。平生習氣掃欲盡。只有媿處著力攻。子歸求之有餘師。惟知歎息錦繡胸。時時杖屨許來往。庶可歲寒相始終。

龍潭丈室一筍穿入露滿其上因賦之

一筍入屋照座寒。凌晨仍有清露溥。益信露珠自根起。正如真水朝泥丸。厦屋不應爲汝穿。不肯屈節斜倚欄。干霄拂雲已在望。且復自保青琅玕。

旱久無水王伯容分惠桃源大谿泉將以長篇水至已雨走筆次韻

七十老翁門晝閉。終日蕭然無一事。卻因不雨動衰懷。擁笏黃堂與祠祀。兼旬旱涸舟不通。井泉欲竭知無計。僮奴抱甕扣比鄰。水不得清僅無滓。舊時見說橫谿源。有水側出萬竹前。攷之爾雅名洧泉。頗思走介分微涓。去之一驛不易到。午暑坐想空垂涎。不知何人剝啄扣我門。惠以小罌童稚驚相傳。啓封一勺挹清泚。烹試茗碗真增妍。況當精禱已孚應。三日簷溜傾潺湲。病中一笑誠莞爾。城闔安有泉如此。吳松四橋思陸羽。白帝城西歌子美。何用中漚取揚子。已覺清甘冰入齒。前人所品殊不定。一下一高隨所喜。老我住世能幾年。引飲一瓢幾子淵。行見甫田取十千。坐使遠近俱安然。欲和大篇不覺沈吟久。擊鉢成

章慙敏手。

送瀟宰富陽

富春富山水。地勝雄三吳。壯哉十萬戶。畿邑拱行都。大江橫吾前。上下萬賈趨。吾子丞剡川。攝事姦已鉅。試縣力愈難。勉旃立規撫。治縣古有譜。近頗多著書。棹閒愛汝厚。誨語皆良圖。老我不惜別。所望安官居。汝亦頗練事。正恐才尙疎。我以熱肺腸。有求應所須。遇事費十思。一跌真不虞。雖當從心年。兢兢矩不踰。況汝年方壯。勿恃才有餘。據輪始窺井。任誕寧失拘。三年待汝歸。二親真倚闥。

又送從子淮

二孫吾所愛。別去殊關情。阿剡將賞延。伴子性亦靈。煩子善誘之。他日使有成。公餘松竹林。共勉雜誦聲。

寄題林宗山巢龜

彼澤之陂。蒲與荷。有美一人。傷如何。潔清如許。豈不好。紉蘭綴離。何足多。七十二鑽。無遺策。不靈于己。徒遭厄。人生何用。千歲爲。願似巢蓮。足清白。

送趙仲禮守天台

棹閒社稷臣。卷藏經濟手。功名付諸郎。秀出諸公右。大兒倅東嘉。洗印去未久。次子鎮赤城。急流去何驟。二者皆爲親。欲奉喬松壽。況有戲綵堂。可繼清獻後。鄰封尤便養。榮侍各書繡。春風扇微和。安輿雲出岫。家傳吏師法。從政于何有。還歸鴛鷺行。金印營繁肘。向來嘗佐郡。山川若僚友。南渡多北客。風味中都舊。

士夫喜公來。紛然迎馬首。其中多故知。頗問老夫否。

贈相手文李道人

生有文在手。縱橫殆天子。其間動成字。往往傳自古。舜襄梁武武。老子子貢五。季友太叔虞。仲子竟歸魯。仲弓有鈞文。宰我亦握戶。敏士自文雅。習道本因輔。鄧淵彭城符。瑣瑣不足數。李邵陶士行。三公皆定數。白帝矜奇瑞。見諂漢世祖。何爲言禍福。歷歷如君語。自言傳希夷。妙處勝貌取。見手知國封。況此細紋縷。研油燎栴檀。始見掌中虜。何如一覽頃。坐談樂與苦。老我縮袖間。不復煩推步。子其訪城中。英傑在何許。

跋余子壽所藏山谷書范孟博傳

山谷晚在宜州。或求作字。山谷問欲何書。則曰。惟先生之意。山谷許以書范孟博傳。或謂南方無復書。山谷曰。平時好讀此傳。遂默誦而書之。舊聞此說。又知在上饒大夫家。願見不可。余子壽來入制幕。博記善屬文。偶談及此。又出摹本及尊公跋語。始知其爲先世舊物也。爲賦長句。

宜人初未宜于人。菜肚老人竟不振。承天院記顧何罪。一斥致死南海濱。賢哉別駕眷遷客。不恤罪罟深相親。攘攘不容處城闔。夜遣二子從夫君。一日攜紙丐奇畫。引筆行墨生烟雲。南方無書可尋閱。默寫此傳終全文。補亡三篋比安世。偶熟此卷非張巡。巖巖汝南范孟博。清裁千載無比倫。坡翁侍母曾啓問。百譎九死氣自伸。別駕去官公亦已。身雖旣衰筆有神。我聞此書久欲見。摹本尙爾況其真。輟公清俸登堅珉。可立懦夫羞佞臣。

葉處士寫照

頃在朝行葉處士光遠爲余寫照。置于山林中。欣然自贊。有云。山林如許。盍歸去。蓋志于歸也。一歸十三年。旣掛冠。再寄一圖。爲老人星狀。形容變盡。非復故吾矣。戲作長句謝之。

老我舊曾官日邊。隨衆年除仍歲遷。母子日夜念鄉國。但欲共耕綿上田。葉君寫照妙一世。畫我形模在山水。有如虎頭貌幼輿。正合置之巖石裏。猶記有客爲諛言。盍更野服爲貂蟬。我笑不答心不然。拂衣徑得歸林泉。歸來歲月不知久。十餘年中何不有。此心炯炯尙如丹。只爲幽憂成老醜。久矣與世俱相忘。荷君念我應老蒼。新圖白髭添一二。豈知雙鬢皆成霜。兩圖對掛耿相照。顧盼從容成一笑。更添松竹作壽星。我已甘心就枯槁。人言姿態與真同。如照止水窺青銅。明知已非故吾矣。小孫指點能呼翁。君居天街號稱首。侯王生面羅左右。邊頭飛將新立功。颯爽英氣照牕牖。名滿四方求者多。千金造門君不呵。能事固不受促迫。應酬雖繁可奈何。胡爲有暇及衰朽。楚楚裝潢意尤厚。我今已是行路人。不須重累丹青手。

送宣宗禹保寧軍掌書記

宣之爲姓世所稀。暇日試爲君家推。宋之宣公舍與夷。子孫相承此爲基。或云出自魯宣伯。元和姓纂言則非。西京功臣虎與義。侯封累世皆宗枝。盛哉雲陽宣巨公。光武稱其勝二龔。鄭爲司空懷在趙。遙遙久矣無亢宗。君家本自太末來。世以儒術爲家風。尙及瞻識諸父行。君方髫鬣成孤童。艱難歷徧屹中立。五行俱下攻時習。自從一登賢士庭。貴名日起人誰及。舍選真似青銅錢。一躍龍門浪三級。吾鄉驚喜破天

荒歸見朋儔愈謙抑。實婺古郡名浙東。往泛綠水依芙蓉。如君入幕假途爾。及今民事宜加工。亭途萬里才發軔。珍祛勿使金樽空。從今家聲當愈大。坐使宣氏崔盧同。

